


AHEPERI,

EKAPIITULU YA NEEEXE

 ...eri wira nisuwelaxe sa Pwiy'ahu oottotopeliwa. Ni eyo ti etthu—etthunelo ahu y'othukumanela va, mwaha wa yeeyo, ni, vano, ni waavekelela aana a Muluku anwereiwa. Ni voosiis'ula hiyo naahikhalana e—eparakha yootepa oreera mwa Soolempwa.

² Nimpavela okuxa, khula okathi wa muteko w'okokhorela, epante ya...Kiniixuttiha Eliivuru y'aHeperi, kinniira, mwa isumana piili sookiserya vano. Nto vano, Apwiya yathuna vale, nnoothikela Namararu ohiyu, numala Ttiminku voosiisu ni Ttiminku ohiyu, nitthikelaka siiso, kaakhalakaru vaava okathi ula. Kahi muhakalaliho, masi owo muhakalaliho, muthukumano mwa ohiyu ahu woolimaleleya. Nto siiso hiyo nri, ooteeliwa murima saana okhalana okathi ula w'othukumana n'apatthan'ihu ooreerasa murima a mmittettheni, ni mukhitte-khitte ntoko oFalls Cities nno. Ni ya—yairaneya vale wira nnimunteerya wala etthu, pooti okhalaka wira Apwiya anooneettiherya, naanaanoxa, wira...khino namuwerya okhalana ohiyu kamosa-kamosa, khino, muxinaasiyu wala etthu, okathi vakhani, vakhalaru ntoko Apwiya animweettiherya siiso, nipuro naakhanly'ahu waathukumanyaka atthu ahu.

Ni noowoona atthu okathi waarwaahu, etthikaka, yiiraka, “Khiwaakhanle opuro wira—wira evolowe.” Vekeekhai, etapernakulu khereere oyeva. Ankela atthu vakhaani, vakhaanixa, ni hiyo ninnitthapa saana wira nyuwo munnitthuna orwa n'ukilaathi moovihani, wira mwiiwe Masu a Apwiya. Ni ninvekela wira Muluku ooreeriheni vanci-enexa, voowaatta ni ookhaliheryeni.

³ Nto vano, ohiy'ula, ninthuna, nimpacerya 4 ka-. . .Akavi yaari vaava voosiis'ula? Nrowe noone matat'anyu. Oh, ti yooreerexa, vowooneya othene anyu. Ni hiyo nri, nimpacerya, kapiitulu 4 ya Eliivuru y'aHeperi. Oh, Eliivuru xeeni yooreerexa! Ennoosivelani Yeeyo? [Muthukumano oniira, “Amen.”—Mol.] Ni enoolikana Yoolempwa ni Yoolempwa.

⁴ Nto Paulo, hata ohinatthi okhalela onamoona musuwelelo awe, owo aahaana toko orowa wArapiya athokose, ni Masu khama yaari Ekeekhaii. Okisivela yeeyo. Ni nisomi na voosiis'ula, hiyo noophwanya wira, mwa wiixuttiha voosiis'ula, wira Kristu aari mmosaru nsana, olelo, ni mahiku othene. Nto Paulo aahiphwanya wira Nripu na Mooro nimosaru naahoola

aana a Isarayeli, naahimukumanana arowaka oTamasiku. Hiyo noophwanya wira Nripu na Mooro, naahoolale aana a Isarayeli mothakoni, arowaka muttethe wa natiri, naahikumana ni Paulo arowaka oTamasiku, ni naahiisiihana Mmansaya, “Yesu.”

⁵ Vano ninnisuwela oMuluku w’eekekhai muulupale wa Yesu Kristu. Eliivuru yothene va ti wiisuupulula paahi wa Yesu Kristu. Nto Owo ohoorwa, hiyo ninnoona wira, “Khalayi ni inamuna sinci-ene, Muluku aahaalavuliha axitiithi ni moolumo a maprofeta; mahiku ala ookiserya mwa Mwan’Awe, Kristu Yesu, Owo ohiisuupulula Mmansawe.” Nto Eliivuru okhuma Maphattuwelo mpakha Wiisuupulula kehiyo etthu ekina woohikhala, wiisuupulula woohihyererya, woohikisa wa Pwiya Yesu.

⁶ Ni ninnoona wira Owo aari Ole aari vamwiiwani waavarela. Ninnoona wira Owo aari Ole aari ni Muluku ohinatthi opattuxiwa olumwenku. Ni ninnoona wira, mwa Waataana Wa Naanaano, Owo aari Muluku ni Mutthu, vamosa. Vano nto Owo vahiyaly’awe Waataana Wa Naanaano, wira arowe Wirimu, Owo iirale, “Kikumme wa Muluku, ni kintthikela wa Muluku.”

⁷ Vano nto okathi Paulo okumann’awe ni Yoowo, Owo aari mwa mukhalelo mmosaru Owo aary’awe okathi waamuhony’awe Isarayeli, Nripu na Mooro. Nto Paulo aahinweha Owo wiitho wene, ory’ene oohirikunxa murima, ni eyo yaahimuruuhela mukattyamiho mmaithoni mahiku awe othene. Owo aahikhala oohoona, ni mahiku manci-ene owo khaawerya woona hat’etthu nnakhala. Owo aahaana weettihiwa ephiro emosa eniihaniwa Yowookowa.

⁸ Nto Muluku aahikhalana profeta mmosa weiwo Owo aalavunly’awe-no, aihaniwa Ananiya, yoowo aarwiiye, ni yoowoona, khumwiixaatherya matat’awe Paulo, khwira, “Munna Saulo, mwaakhele woona wanyu.”

⁹ Ni ninnoona, nto, wira Eroho Yowarya emosaru yeeyo, Pwiya Yesu mmosaru yoowo, aahimukhumelela Petru mwa mukhalelo wa Waarya khimukumaha mukhatteya.

¹⁰ Ni ninniphwanya wira Pwiya Yesu yoowo mmosaru, mahiku ala, nlelo ori muNripuni na Mooro memmo (Waarya) onaahoola athu Awe (Ekereja Awe), avaraka etthu emosaru, avahaka soowoona; so orwa owiixaatherya matata atthu, ni yoowoona. Pwiya Yesu, Yoowo aakikhumelenle Ettiminku evinre voosiisu owaani, khwira wira aahikhala mulopwana mmosa aarwa, a maihi ooriipa, onuuluvala. Owo aari muKreku. Mwaar’awe aari a munnuwelo w’eriyari, ni aamukhala anlaka waltaari.

¹¹ Amosa-amosa yaahileeliwa eyo, ni yaahisuwela wira yaamwiiraneya. Owo aari oorakala, mu—mutika w’omulipiha mmuruni mw’awe khaarina. Owo hata khaawerya olipiherya inawu sawe wala miyoono sawe ni metto sawe. Ni aari oohoona. Ni ntoko iyooniheryo piili: kaahinvekela muhano

mmosa mwaamukhaani orwa waavekelela aretta, toko, numala khurukunuwa khunvekela Munna Thom orwa ovekela. Nto hiyo, nikilanthé-ene va, niwehaka moota yairaney'aya. Vano nto kaahikhuruwa khwaavekelela aretta, khutthika. Vano owo khurwa, voolikana siiso ntoko yoowoona, khukivara moonoo khupacerya wunla, ni khuhimya wira Dr. Ackerman t'arumme awo wenno. Dr. Ackerman mpatthani aka a vatthirima, muKatolika. Mwan'awe mwamulopwana phaatiromusteero wa—wa Saint Meinrad, ni oIndiana nno. Nto mulopwan'ola aari a oJasper. Vano Apwiya khunvonihá, khukhuma vakhaterani vale. Owo khuvénya khuneetta. Owo aaniwerya woona saana ntoko mutthu ti mutthu. Vano aahikhuma mpaani eettaka, oolikana ni mukumi. Sothene mwa yoowoona!

12 “Munna Saulo, Apwiya Yesu yookhumelenleni mphironi, aakiruma wira kiwiixaatheryeni matata, wira mwaakhele woona wanyu ni mukhale oosareya Eroho Yowarya.” Vooreerexa.

13 “Vano ninnoona wira, woonaka wira nookhalana woopowa nno wuulupale, khivaatthuneya hiyo... Khinaarowa owerya otthyawa ihukhumu ni oviruwa wa Muluku, nanyoonyeriwa-ru woopowa iwo wuulupale.”

14 Vano ninrowa opacerya osoma, ohiy'ula, ya, ni opacerya kapiitulu 4 ya Eliivuru y'aHeperi. Akhala mutthu onthuna othhara, nookhalana aBibilia kamosa-kamosa va. Yamutthuna vale mmosa, vano, mmosa w'alipa-ookhaliherya onimooruuhelani, mwavenxaru ntata, ala—aBibilia ala. Vakhala wira mmosa a axinna va onookuxa. . . Aakhala aBibilia anli ari vale, kookupali.

15 Nto vano nmimwaakuva, okhala wira nihaana ekomunyawu nuvira okathi vakhani. Nto vaavo ommalel'ahu ohiy'ula, Namararu ohiyu ninoopacerya-tho. Vano, kookupali, voosiis'ula mwa osoma wahu, nipacenrye versiikulu 15.

16 Mutthu, khino pooti ahaasuwela wira kinniwara ilumeta, wira kisome. Miyo kinimuuluvala. Ni nlelo kinniwerya osoma, masi nkinwerya wira kaakuvaka, vanci-enexa kakhhalana osoma sooyevexa va, ileetera sooyeva.

17 Nto kaahirowa omwaleiwa maitho aka, wira kooniwe sinto veekhai waamukipweteya woona waka. Maitho aka yaari muloko-muloko. Owo khwira, “Masi mooviriha miyaakha miloko mixexe, mwan'aka.” Owo aahikhalana etthu wira kisome, khwira, “Mpacerye osoma eyo.” Miyo khusoma. Nto okathi waattamel'aka, yaakhala vakhani-vakhani. Nto eyo khuphiya ntoko sa, miyo khweemela. Vano owo khuphimela vale muloko-muloko, kaaniwerya osoma khula nipuro. Masi owo khwira, “Eniireya, okhala wira mutthu aviriha miyaakha miloko mixexe, irukuruku sa maitho sinkhala soopapattheleya.”

18 Vano, kinniwerya othetemaniha maitho aka n'usoma siiso vakhiviru, masi muhaana othetemaniha. Tivo, owo

ookipakela ephaara emosa ya ilumeta. Kinniwerya woona, khula nipuro, yakhalaru vakhiviruxa ni miyo. Vano, yakirakamelaru, nkinwerya woona hat'etthu ni itthu iya. Masi kinnisoma, kinnisoma okhuma va ni ilumeta iya.

¹⁹ Vano, voosiis'ula, naahoono epantte yookiserya ya kapiitulu 3 y'aHeperi. Ni, oh, irimarima xeeni soowaatta nimphwanyaaahu! Vano nwiriyane, kintthuna kisome-tho, wira nikhhalane mulipiheryo vano. Kahi olavula yeeyo, masi ovira-mo vakhani paahi.

Tivo vanihimmw'aya, Olelo nyuwo...mwaiwa nsu nawe, muhuumihe murim'anyu ntoko woopaciwani.

Tani, yaale, yaiwale Masu, vaiwaly'aya Masu, khumpaca: khahiyo othene yaakumihewe wEjitu ni Moise.

²⁰ Vano, mwa yeeyo, voosiis'ula, nihoona wira Owo iirale, "Muhuumihe murim'anyu vano, ntoko mahiku a woopaciwani." Owo waari okathi awo yamuruuhenly'aya Muluku oviruwa, okhala wira Owo aahaavaha Moise, profeta Awe, ni ekanyeryo yaari ni Moise. Akavi, a vamuttitthini ohiy'ula, answela ele yaari ekanyeryo eyo? Nripu na Mooro, aHeperi 13.

²¹ Vano, hiyo khaninsuwela sinto muthukumano waahoono ekanyeryo eyo wala nnari. Masi Moise aahoono, maana Moise aatonko okumana ni Yoowo vamwiiwani waavarela. Owo aari Mooro. Nto aana a Isarayeli yaahimwiiwelela Moise khikhuma wEjitu. Nto emalakarulo okhuma wEjitu, nihoona wira, Muluku, naanaanoru aaweettihenrye vantaphani. Vaavo, anakhotto a Farawo yaary'aya ottuli waya, Ephareya Yooxeerya ipantte soopiili, nto Muluku aahaahela mowehereriwani; vano awo yaahituthuwa. Nto eyo yaahimpaca Muluku. Owo khwira, "Munikinyakulela-ni Miyo?" Khwira, "Mulavule paahi mukeleleke ohoolo." Okisivela eyo.

²² Vano, awo yaamutthara Moise, okathi Moise waatthar'awe Nripu ni Neeku, nto awo yaatthara ephiro arowaka muttetthe wa natiri. Elatarato yooreerela Ekereja, ohiy'ula, ephiro ahu nirowaka Muttetthe wa natiri, neetihiwaka ni Eroho emosaru, ithoonyeryo imosaru ni sootikinaha ntoko Muluku sihimaly'awe.

²³ Vano nwehe. Nto, awo yaahiphiya Mothakoni mwa Etampi. Ma—maasi yaari "oowaawa," oMara. Xeeni Muluku akelaka oweettiherya omaasini oowaawa? Enkhala ntoko Owo aahaana oweettiherya omaasini ooreera. Masi Owo aaweettihenrye omaasini oowaawa wira Owo eehererye waamini waya. Owo omusivela wira eyo. Owo omusivela ohiya ihaawelo woorweelani, owoonihani wira Owo onniwerya wooruuhelani ophenta Wawe ni owerya Wawe. Atthu anwerya sayi, olelo, ahinaamini ovara muteko wa mwiiriirya wa Muluku, okathi ihaawelo sinirw'aya, awo anixintiw'aya n'urowa? Masi

hiyo ninnaamini wira “Muluku onnipaka miiriya.” Owo khokhanle . . . Muluku ohaana . . .

²⁴ Nwiriyaane ela. Vakhala wira Muluku khaniira vamosaru, okathi soowiireya imosaru sinkhumelel’aya, weso Muluku t’ottheka mwaha wo waathanlaka atthu Awe. Eyuulupale ya Muluku ennivekela Owo ovara mwa khula mwaha ntoko Owo siiraly’awe mwaha woopacerya, ahiiso Owo aahivonya okathi waavanry’awe mwaha woopacerya. Vakhala wira Muluku khoniira enamuna emosaru Owo siiraly’awe mwaha woopacerya, vakhala wira Owo onimwiirela voovirikana wa mwaha nenli, nto Owo aahiira voovonyeya okathi wiiraly’awe wa mwaha woopacerya. Vakhala wira Muluku aahaavoniha aretta mwa Waataana Wa Khalayi, Owo ohaana wira mwa Waataana Wa Naanaano ni olelo, ahiiso Owo aahiira voovonyeya okathi waavonihaly’awe ale ottuli wu. Owo ohaana wira vamosaru, khula okathi. Ni owo onimwiira, okathi waamini omosaru onittharih’aya yootthuneya. Ovonya ori mwa hiyo, kahi mwa Muluku. Vano hiyo ninnimoona Owo mw’akina, ni anci-ene, opaka miiriya suulupale soosuwanyeya. Hiyo noosuwela. Mulipa-oowuulumela khokhanle wira, “Kahi siiso.” Maana hiyo ninnoona wira Eyo ennooniherya, ni eyo eri vo.

²⁵ Awo yaanihimya, “Mukoonihe mwiiriya mmosa.” Awo khanwerya ohimya-tho yeeyo. Siyensiya khonwerya-tho ohimya. Hiyo ninniweya voomalela wooniherya olumwenku wa siyensiya. Ni olumwenku wa siyensiya wookhalela onamoona wira Ookhala a wirimu, mwa mukhalelo wa Nripu na Mooro, ori ni hiyo. Va eri elatarato Awe, vaava va, ni emosa ethomeiwe oWashington, DC, ohiy’ula. Ti Kristu mmosaru.

²⁶ Tivo, woovira okathi, axinn’aka arumeyi yaanikiirelaka, “Oh, Munna Branham, owo ti xetwani. Muhimuxikhe owo.” Yaanikitutuxa.

²⁷ Nto miyo nkaalalenrye mpakha Muluku orwa khuupulula, wira, “Owo ti Yesu yoowo, mmosaru Yoole.” Oh, ophavela okikumiha eyo? Khivanweryaneya wiiriwa. Maana, ti Yoolempwa. Awo Masu a Muluku. Kuhiyo musuwelelo paahi ori wootaphuwa. Owo musuwelelo olipiheriwe ni Masu a Muluku ni natiri a Muluku ooreerihiwa Ohinimala.

²⁸ Vano, hiyo ninniweha va, wira Owo oohimya.

Tani ale, yaamwiiwale, khumpaca: . . .

Vekeekhai. Awo yaanikhulumuwa, khula okathi yaaphiy’aya nipuro vaavo mutharimulo waarw’aya. Nto awo yiira exeeni? Awo yaaninyoonyeya, n’ukhala ookhulumuwa, n’utthuna othhika, ni, “Ekikhumelelenle-ni yeela miyo?”

²⁹ Etthu yootikiniha, voosiis’ula, numala olaleerya yeeyo vowiilipiha ntoko saawenry’aka, yaahikhala anci-ene jaarwiie waltaari khunakoha Yeeyo, “Xeeni ela okikhumelelaka miyo?”

Munnoona moota enrow'aya? Eyo ennaavira atthu vasulu. Eyo emosaru paahi, mw'atthu.

³⁰ Yesu oohimya, "Mookhalana maitho, masi khamunwerya woona." Owo aahaahimeerya yeeyo awiixutti.

³¹ Awo khwira, "Moone, vano Nyuwu munnilavula voowiiweya. Vano hiyo ninnaamini. Khaavo orina wooleelani hat'etthu, okhala wira Muluku onniwoonihani."

³² Owo khwira, "Munnaamini vano, nuvira okathi ula wothene?" Munnona?

³³ Muhimukoheke hat'etthu, Muluku. "Maana mavalo a naxariya aneettiheriwa n'Apwiya." Ni khula weeheriwa munruuheliwa, wira mweeheriwe. Ni Bibilia oohimya, "Ti wooreerexa wa nyuwu ovikana eweero." Tivo Muluku ahiya mixankiho vakhani sooveya wookhumelelani, muupuwele, siri wira soolokiheni. "Khula mwaana onoorwa wa Muluku ohaana toko ohukhummwa ni Muluku, ni weeheriwa, ni oxuttihiwa ntoko mwaana." Khasivo ihiyanelo. "Khula mwaana onrwa." Nto mixankiho iya sinnitthuniheriwa, iyo siniruuihiwa, wira wooniwe mweettelo xeeni onrow'anyu okuxa. Munnona? Ti Muluku, vapuwani va vo weeherya. Ti siiso elapo ya vathi yothene ekhanly'aya, mmapuwani mo weeherya, ni vaavo Owo omphavel'awe oweeheryani.

³⁴ Vano nwiriyane, naakelelaka ohoolo. Ni kintthuna khiphiye epantte yookiserya ya yeeyo.

*Nto t'ani owo aalaphenly'awe wira khiyaarowa
ovolowa momumulani mwawe, . . .*

Vano, ti vaavo vanrwaahu, ohiy'ula.

*. . . momumulani mwawe, khahiyo yaale
yahaamwiiwelela?*

*Tthiri ninnoona wira awo khiyaawenrye ovolowa . . .
mwaha wo ohaamini.*

³⁵ Vano, etampi exeeni? Ohaamini. Muluku aahoorwa w'awo, mwa Nripu na Mooro; aahinveleliha profeta Awe, ni aahimuttikitthela, khunvaha ithoonyeryo wira avare ohoolo w'atthu. Vano nto Nripu na Mooro, ni profeta, naahaakumiha. Khula yookhumelela awo yaaphiyery'aya, yaanipacerya waapa n'uhimya khula evonyeryo yaamukhaani awo yampfwanyan'aya Moise, opacerya omuulumela ni omulavulela. Nto Muluku khaasiveliwe, okhala wira Owo iirale wira awo yaamuttheke.

³⁶ Awo yaahaana wiiwa. Masi, ohiya vo, awo yaiwelenle waanyiherya, "Enweryaneya sayi okhala? Sinweryaneya sayi itthu iya okhala?" Vakhala wira Owo Mulukuu, sothene sinniweryaneya. Ni Owo onimweettiheriya itthu sothene vowaareeriha ale animphenta Yoowo.

³⁷ Vano ninrowa m'osomani wuulupale va, okhanle, "Momumulani," *esabbath*. Vano, awo yaari anawetta mmukwahani mwaya. Munnona? Awo yaahikhala wEjitu, miyaakha imiya xexe, ni mw'epothhani. Nto vano awo yaamukumihiwa ni miiriirya sa Muluku, omuttharihaka natiri Awe. Ni awo yaatthara ephiro aya arowaka muttethe wa natiri. Nto va onkhumelela Waarya w'erimu, eriyari aya, khupacerya waahoola.

³⁸ Vano, mutthu aamwiira, "Vano, nkawehani va, Moise ola ti pani? T'ani ookhalinheni muhooleli wa hiyo? Nyuwo khamuhiyo mmosa a hiyo? Ti pani oohenleni va wira mukhale mukhulupale ahu? Munuupuwela wira munnisuwelaxa onvikana pastore ahu? Munuupuwela wira munnisuwelaxa onvikana namukuttho ahu? Munuupuwela wira mwa—mwa aankhili ovikana ele akhanle athu ahu anatiini, a olelo?" Eyo khiyaarina naata n'iyo.

Aari Mulukuu, mwa Nripu na Mooro, alipiheryaka wira Owo aari mwa mwah'owo. Khiyaavirikana hata vakhani ti pani aari aankhili ni pani ahaari aankhili. Yaari etthunelo y'otthara ele Muluku aahenly'awe ohoolo waya.

³⁹ Vano, Moise, ntoko v'erutthu, aahiira etthu y'elolo okathi waaphavenly'awe owoopola aana ni Masu a Muluku, akumihaka nikhuru n'atthu mothakoni. Okathi waarin'awe yawawe... Vano, owo aari mulipa-oorithi sothene awo saarin'aya. Owo aahikhalana anatoropa othene yaakhanle, molumwenkuni mothene, vathi vawe. Nto owo aari vale, mukhulupale oomalela a anatoropa. Nto voottharelana, owo aarowa okhala mwene, Farawo a wEjitu. Vano, owo aaniwerya wira owenlene veehiceni, ni wira, "Vaareera, anamwane, mutthikeleke owannyu." Eyo ennimaliha mwaha; owo aari Farawo. Masi Moise...

⁴⁰ Oh, ela va. Moise, mwaha wo *waamini*, aahimoona natiri a Muluku. Nto Nlaikha n'Apwiya naahimukhumelela, ni owo aahisuwelaxa sa Muluku, muhina mwa minuutu mithanu ohoolo wa Nlaikha nle, ovikana saaxuttaly'awe mwa miyaakha miloko mixexe n'awiixuttihi a wEjitu. Aahisuwela wira Owo aahikhala. Owo aahoona y'erimu wiiriwa.

⁴¹ Owo khwira, "Miyo kinookhala ni nyuwo, Moise. Kinoorowa ohoolo wanyu." Vano awo yaahiiwa saana. Nto Owo aahinvaha ithoonyeryo wira apake.

⁴² Vano, awo yaatthara ephiro arowaka muttethe wo omumula. Muluku aahikhalana omumula w'awo, nipuro nimos awo yahaarin'aya okhala...makapataaxi w'awo, yaasukhuma, owiiriha opaka itthu.

⁴³ Elatarato xeeni yooreerela olelo, naawehaka ekereja ni woona ekereja mwa mukhalelo aya. Khula mutthu oyariwe ni Eroho ya Muluku onnithanya olumwenku, "Nto mwaaphentaka olumwenku wala itthu sa molumwenkuni, mphento wa Muluku

hata khokhanle mwa nyuwo.” Ti yeeyo Bibilia ehimaly’awe. Nto nawetta eekeekhai, mphironi mwawe, sinnimunana paahi itthu sa molumwenkuni. Owo ennimunana owoona atthu ewuryaka. Ennimunanara owoona atthu onvura sikaro. Owo ennimunana owoona athiyana mphironi, n’ikuwo iye sikhaani soonanarasa ewanre-ene. Ennimunanara woona meera a cuuku ni iturufu.

⁴⁴ Nto nsana, okathi Munna Tony . . . ahiiso Munna Wood ni miyo naarw’ahu mphironi, ni akina-tho, axilopwana akina . . . Aahikhala mwamuthiyana mmosa iwe oLouisville, aakhuruwela ephiro, mwamuthiyana mmosa ooreerela, owanre-ene ikuwo saari sootepa onanara; etthu yaamukhaani paahi muyuununi, ni ekhulula yaamukhaani yoothukiwa muyuununi mwawe, khula epantte, ni ekapatti yaamukhaani y’ekuwo yowaapheela ohoolo wawe, ni yaatthukiwe ni mukhoyi ottuli. Eettaka mphironi, vooanarexa, nto khula mulopwana mphironi anwehaka yoowo. Miyo khwira, “Khonsuwela wira t’ottheka, vamaithoni va Muluku, mwaha wo oraruwa ni khula mulopwana omuwenhe mwa enamuna yeele. Ni owo onimwaakhula nihiku no olamuliwa mwaha wo oraruwa n’axilopwana ale.”

⁴⁵ Yesu ohimye wira, “Ole oninweha muthiyana anwerihaka murima, oomala oraruwana yoowo.” Ti yeeyo.

⁴⁶ Tivo, moone, Munna Wood khukiirela, “Ele enkhala mwaha wa xeeni, Munna Branham?”

⁴⁷ Miyo khwira, “Enkhala mwaha w’opahuwa wala ovariwa xetwani.” Siri itthu piili siniiriha. Muthiyana, owiisumaaliha ooreerela khonrowa owara itthu iye; voohikhala wira ovariwa xetwani. Eyo Ekeekhai voolikana.

⁴⁸ Vano, nawetta onrowa Wirimu, owo onkhala mwa enamuna ekina. Khamurina oxanka wira owo onoomuweha. Onoorukunxa muru awe vakhalaru wira ookhalana Muluku mmurimani mwawe, maana owo onkhala mwa enamuna y’okhala emosa eri imiilya imilyawu sene wa itthu iyo. Ti yeeyo. Khamunthuna okhala oottheka mwaha wa itthu iyo, woolamuliwani. Tivo owo onoorukunxa muru awe ni wira, “Muluku, mmumorele ikharari muthiyany’ole,” n’urowa. Hiyo nri mmukwahani mwahu. Nri mphironi mwahu nirowaka Muttethe w’oKanani. Nri mphironi mwahu nirowaka Momumulani mme Woohimala ni wa iparakha Muluku onivahaly’awe. Nto mmukwahani, ninnittehattehiwa. Ninnittehattehiwa wa inamuna sothene sa itthu, masi ninkhla ootthehattehiwa nihiiraka etampi.

⁴⁹ Vano nwehe, nirowelaka kapiitulu 4, “Tivo niikasoopeke.”

Tivo niikasoopeke, wira, natiri nioromelihiw’ahu wo ovolowa momumulani mwawe, . . .

⁵⁰ Kintthuna wira muupuwele, wira, voohikhala wira ninooweha saana, voohikhala wira Muluku onoonuupululela

eyo! Hata ninrowa okereja sayi, eyo kherina naata n'iyu. Muluku ohaana orwa ni muupululo ni wiisuupulula Mwaneene wa hiyo, eyo ennikumiha itthu sothene sa molumwenkuni. "Vano, vanihimmw'aya, 'Olelo nyuwo . . ."

51 Vano nrowe nipacerye ka—kapiitulu 4.

Tivo niikasoopeke, wira, natiri nioromelihiw'ahu wo ovolowa momumulani mwawe, . . .

52 Vano muupuwele, okathi awo waary'aya erowaka Omumula, Nripu na Mooro naanaahoola. Vano ninthuna nisuwele, "Omumula nno exeenii?"

Nrowe . . . niikasoopeke, wira, natiri nioromelihiw'ahu wo ovolowa momumulani mwawe, (nwehe), hata mutthu a nyuwo ahiphwanyive ahiphwanelaka.

53 Vano, va ori natiri. Va eri ele erin'ahu woova: vaakhanle wira khaakhanle natiri ohiyeriw'ahu. Masi ookhala natiri! Vano nto, etthu enttharelana, ohiphwanyiva nihiphwanelaka.

54 Vano, muupuwelo ti, vakhala wira niri mphironi nirowaka Momumulani, Omumula wene t'uvi? Ori vayi? Onkhala wiitakanxa mukereja? Onkhala opatisiwa enamuna emosa? Onkhala okhala mempuru a ekereja yuulupalexa mpooma? Owara ikuwo sootepa oreera? Onkhala osoma? Onkhala musurukhu, wira nihiye ovara muteko ni wumpaathi paahi, omumula ekumi ahu yothene, ntoko siniihan'ahu? Kahi yeeyo.

55 Nwiryane ele Bibilia enihimy'awe okhala, ni moota omphwanyaahu.

Tivo niikasoopeke, wira, natiri nioromelihiw'ahu wo ovolowa momumulani mwawe, hata mutthu a nyuwo ahiphwanyive ahiphwanelaka.

Tthiri ni hiyo-tho (nihiku nle iwe) noolaleeriwa, ehapari yooreera ntoko awo: . . .

Ehapari yooreera exeenii? Mihupi sooreera. Mihupi sooreera saahaaphiyerya awo wEjitu, wira, "Muluku oomuruma nvuluxa, ni wira Owo onrowa onikumaha ni oniroiha muttetthe wa natiri."

56 Mihupi sooreera wa hiyo vano, wira, "Muluku oomuruma Nvuluxa, Eroho Yowarya, ni nri mphironi nirowaka Muttetthe wa natiri." Vano atthu aapaka iyaaminelo ni miromolelo, masi Muluku nlelo onkelela ohoolo, wira, *Omumula* wahu ti "Eroho Yowarya."

57 Nwehe.

. . .ehapari yooreera yaahilaleeriwa . . .awo siiso ntoko hiyo: nto masu awo yiivaly'aya khiyaattottenle etthu, e . . .

Muupuwele:

*...masu awo yaiwaly'aya khiyaattottenle ethhu,
okhala wira ale yaiwale khiyaatakaninhe ni waamini.*

58 Oh, axinn'aka, mukihye keemele vaava minuutu mmosa. Khivancala moota zeeni Masu anlaleiw'aya, moota zeeni anoosivel'ayani enamuna anlaleiw'aya, voohikhala wira nyuwo mmansinyu muniira mpantte wa Yaawo, Awo kanooreerelani hat'ethhu.

... ale yaiwale khiyaatakaninhe ni waamini.

59 Awo yaahoonaa miiriirya sa Moise. Awo khwira, "Eyo ti yooreera saana." Vano awo khuvira erowaka. Awo—awo yaahimoonaa owo opaka miiriirya. Ni awo yaahoonaa Nripu na Mooro, khino, wala yaahiwiiwa elavulaka mwaha wa Nenlo. "Oh, eyo ti yooreera."

60 Masi khiyaatakaninhe ni waamini wa mutthu. Maana awo emalakaruu ophiya mothakoni, awo (khula mmosa) yaahipacerya waapa. Nto Muluku khwira, "Okhala wira awo yaahihoverya, yaari etampi." Muhihoverye hat'ethhu. Mwaamini. Muhihoverye, hata wira mwah'owo olimpe sayi, mwaamini Iyo.

61 Vano awo khupacerya waapa, nto Muluku khwaamoroxa. Vano nto Owo aahilapha, mwa oviruwa Wawe, wira, "Awo khiyaakhalakhala evolowaka Momumulani mw'Awe." Ni Bibilia oohimya va, kookupali wira Eri mu—kapiitulu 3, wira, "Irutthu saya saahimora mothakoni."

62 Kapiitulu 3 ni versiikulu 17.

*Masi t'ani owo aananariw'awe ni yaawo mpakha
miyaakha miloko mixexe? khahiyo yaale yiirale itampi,
irutthu saya khomura mothakoni?*

63 Nto othene aya yaakhumme wEjitu, anli paahi ti yaavolonwe muttetthe wa natiri. Wa olumwenku wothene wa mutaseke, mahiku avinre, yaari atthu athanu n'araru yooonwe, wa ipilyawu. "Mukhora ti woophunyeya ni ephiro ti yoorika, nto masi ale amphwanyaya eyo ari vakhani."

64 Atthu kamosa-kamosa aniira, "Vano, Munna Branham, anki ale ikonto sene Bibilia ohimmy'awe wira anookhumelela weiwe?"

Nwuupuwele paahi akavi akhwiye mwa khula nloko, yaari aKristu, moovirani m'okathi. Othene awo anoohihimuwa. Eyo t'empaka Erutthu. Nyuwo munwehererya wira anookhala ipilyawu emiya anrowa okhuma, wAmerika mu, wala ethhu siiso, olumwenk'ula olelo. Khino pooti ohikhala miloko mithanu ankhuma. Masi Ekereja yuulupale yoovuluxiwa emphwanyaneyaya vatthayani, elipelelaka. Awo maniya a Muluku ammumula mutthayani. Masi minepa saya siri vathi v'altaari a Muluku. Awo khakhanle mwa mukhalelo aya wooloka. Awo ari mw'erutthu emosa, vekeekhai, masi eteyofaniya. Nto awo annimukhuwelela Muluku, "Mpakha liini?" Awo yaaniwerya

woonana mmosa ni mukhw'awe, masi khiyaawerya ovahana matata mmosa ni mukhw'awe, muthint'owo w'erutthu.

⁶⁵ Mwakumana n'ame anyu Movuwani ohiy'ula, vaakhanle wira mwaamurowa, khimwaawerya waavaha ntata okhala wira kharina muthinto owo wa ntata. Khimwaawerya woona ntoko sinoon'anyu vano. Okhala wira, iyooneo thanu s'erutthu t'eye siheliwe mw'erutthu ila, sinwerya weettiherya. Mukhalelo aya waamurowa wooneya enamuna y'ekhalelo yoovirikana.

⁶⁶ Eyo eri ntoko iya ni mwaara. Khunrowa okhala othelana, wala otheliha, Wirimu. Mwaha wa xeeni? Okhala wira iwe oriwo muthinto mukina wa mphento. Khuuvo otthuna ekhapa. Itthu iyo sothene soovira. Nyuwo munkhala ookukutthiwa ni ooloka.

Masi nyuwo khamunatoko okhala mwa mukhalel'ole, tivo khampattuxeriwe mukhalelo yoowo. Munoolipelela paahi iwe. Masi munoowehererya otthikela weiwo opattuxiw'anyu mulopwana ni muthiyana, nto iwo Muluku onoovenxa erutthu iyo vatthayani v'elapo ni avuwihe. Nto munimoona, munoolawiha, munimwaapapela, munimoona wunkhela ni wiiwa, ni opatthana. Khaninrowa osuwela . . .

Khinaakhanle opuhaka ekumi ya Nlaikha. Hiyo khanipattuxiwe Malaikha. Muluku opattunxe Malaikha. Masi Owo oopattunxeni nyuwo ni miyo, alopwana ni athiyana. Owo ti mukhalelo onrow'ahu okhala-mo, mahiku othene, w'Orwaani Wawe woottotopeliwa.

⁶⁷ Vano, moone moota awo yahaaphwanenly'aya, okhala wira yaarimwiira etampi kuhiphwanya ovuwa. Muluku aahiwooniha Nripu na Mooro. Owo aahiwooniha ithoonyeryo ni sootikiniha. Nwo aahiweettiherya khukhuma. Owo ahaaruha moweereriwani, wira oweehererye ni owootola.

⁶⁸ Vano, nyuwo khamunkhalanaka weereriwa vanci-ene? Muhiisinliheke mwaha wa seiyo. Mutthapeke. Muluku ori ni nyuwo. Owo omphavela wootola waamini wanyu. Nkanweheni Yobi mwa Waataana Wa Khalayi, okathi Owo iiraly'awe, "Monweha murumeyi Aka Yobi, mutthu naxariya, mutthu ooloka? Khuuvo onlikana n'uwo mulaponi."

⁶⁹ "Oh," owo khwira, "veekkehai, Nyuwo muronvarelela: khorina hata mikattyamiho, khorina hata mixankiho. Owo khorina hata miritti sa musurukhu, sothene siri saana. Owo khorina hata eretta, hata owereya. Mukinnye. Kinoomwiiriha owo wootakhalihani ohoolo Wanyu."

⁷⁰ Owo khwira, "Ori mmatatani mwanyu, masi muhikwanye ekumi awe."

⁷¹ Oh! Owo aahiira sothene masi khaakumihale ekumi awe, masi khaawenrye omuttikinya Yobi. Yobi aanisuwela wira aahilipa mwa Masu. Ti yeeyo. Nto axetwani othene a

omooroni khiyaawerya omuttikinya, maana owo aahisuwela wira aahivaha mukuttho ole. Owo aari naxariya. Nto awo yaanimootherya, khwira, “Nyuwo moottheke, Yobi, nto Muluku onimooohukhumuni.” Owo aanisuwela wira Muluku khaarina . . . wira owo khaatthenke vamaithoni va Muluku. Owo aanisuwela wira aari naxariya. Kahi mwaha wo wira aari mutthu ooreera murima, masi okhala wira owo aanikupali mukuttho woopahiwa voopuroni vawe.

⁷² Nto, ohiy’ula, noosuwela wira makhalelo awe yaahooniherya wira aari naxariya. Nto okathi nyuwo . . . Kahi ophavela ophiya owaani Movuwani mwaha wo wira munniphavela omukhaliherya namwaattamanani anyu; eyo ti yooreera. Kahi mwaha wo wira muhiitakaniha mukereja; eyo ti yooreera. Masi munrowa owaani Movuwani okhala wira mookupali exariya ya Yesu Kristu, khiivo hat’etthu mwiiraly’anyu mmansinyu.

⁷³ Vano, nitthikelaka osoma.

Tthiri ni hiyo-tho noolaleeriwa ehapari yooreera, . . . (versiikulu 2) . . . ntoko awo yaalaleeriw’aya: nto masu awo yaiwaly’aya khiyaattottenle etthu, okhala wira khiyaatakaninhe ni waamini.

Waamini khiwaakhanle mw’ale yaiwale Masu.

⁷⁴ Muupuwele paahi, olelo, mwa muteko, mwaamukhaani wo wiiveviha Apwiya akivahaly’aya, yaahaana okhala atthu imilyawu miloko mixexe a wAmerika owoopowa, ohiy’ula. Moosuwela etthu anihimiy’aya? “Vano, iwo osoma miyuupuwelo. Owo namasoma muupuwelo. Khiivo etthu ene eyo! Vano, owo khoniira mpantta wa ekerej’ahu.” Munnona? Kehiyo . . . hata wira munihela sayi mwa Masu ni wooniherya wira ti Masu a Muluku, ti natiri a Muluku, hata wira siyensiya aarowa wooniherya sayi wira Eyo ekeekhaii, awo nlelo khanwerya waamini. Bibilia ohimye wira khiyaawerya.

⁷⁵ Aniira, “Nto eniphwanyiha-ni olaleerya Yaawo?” Muluku ohaana okhalana namoona, wira aalamule, Nihiku nenlo. Masu yaahilaleiwa ni khooniheriwa eriyari aya, nto awo nlelo voohicala khukhuma erowaka. Khiivo hat’etthu ehanle woohikhala olamuliwa. Muluku khaakhanle vaxariya—khaakhanle vaxariya-vo olamulaka nloko vahikhanle wira naahikhalana omoreliwa ikharari nihinatthi ophwanya olamuliwa. Owo Mulukuu. Owo khaakhanle wira.

⁷⁶ Vano hiyo nnihimya-ni?

Nto hiyo . . . naaminni nave-tho noovolowa momumulani, ntoko owo ohimaly’awe, Siiso miyo koolaphela kiviruwale-ene, khankhala-khala evolowaka momumulani mwaka: vanamwi miteko saya saamalelihiwe okhuma opattu.xiwi’aya olumwenku.

*Maana owo oohimya nipuro nimoso mwaha—mwaha
wa nihiku na neethanu nenli, . . .*

77 Vano, nkinthuna waananariha atthu moonelo aya, voovirikanya etiini aya. Eyo kehiyo entthun'aka. Wu mmapuwani, kinlaleya paahi miixuttiho suulupale sa ehapari yooreera, soophaveleya. Masi mutapernakulu, eriyari y'an'aka va, kinoona wira kookhalana ehakhi yo olaleya etthu enuupuwel'aka wira t'ukhanle Mwiiixuttiho ni Ekeekhai. Munnona? Kinoona wira eyo ti yoolikana.

78 Vano, kookhalana apatthani ikonto sene ooreera murima Anasaapatu, a atthu akhanle Ativentista a Seetimu tiya. Amosa-amosa w'axipatthani oophenteyaxa kirin'aka, amosa-amosa a awo t'Ativentista a Seetimu tiya.

Enamwi, eyeetelo yuulupale, eniihaniwa, n—*Nsu na oProfeta*, awo t'okivirikanya voolipa-vo. Awo ahimye wira miyo kiroohimya nuulumo vapulpitu, nto khwira wira, “Miyo kaari Mulukuu. Ni wira—ni wira Waarya nno waatthara naari Nlaikha, nto miyo kaari Mulukuu. Ni wira kirwiiye molumwenkuni opaka itthu suulupale, owooniherya atthu wira miyo kaari Mulukuu.” Vano, ti yeeyo *Nsu na oProfeta* ahimaly'aya mwaha wa miyo, oCalifornia. Nto onakhaleru pani ohimye eyo, moosuwela, ohimye etthu, yahaari yoolikana.

79 Masi voopacerya, kihikhalanaka muupuwelo woovirikanya ekereja Ativentista ya Seetimu tiya wala ekereja ekina y'Asaapatu, masi mwaha paahi wa Ehapari yooreera. Ninoophiyerya, mwa minuutu vakhani, w'aPentekosite, nave. Ayo. Ekeekhai. W'aPatista, ninoophiyerya yeeyo ni wooniherya wira Muluku khonsiveliha hata muromolelo. Eyo ekeekhaii. Owo onimucalela mutthu v'omeekha. Owo khoneetta ni muromolelo, Owo khonatoko wira ni khankhala-khala airaka, vootthariha Masu Awe. Masi Owo oneetta ni atthu v'omeekha mwa khula muromolelo. Ayo, t'atthu v'omeekha Muluku oneettan'awe.

80 Vano nwiriyane ela oratteenexa, vakhala-khala, okathi p'ukathi yoorweelakani yookoha eyo, enoomaliheriwa. Vano, Apwiya enikhaliherye.

81 Vano, nwiriyane oratteene, “Maana . . .” Versiikulu 4.

*Maana owo oohimya nipuro nimoso mwaha wa nihiku
na neethanu nenli, . . .*

82 Vano nwehe. Owo onlavula mwaha w'esabbath. Akavi ansuwela nuulumo s-a-b-b-a-t-h mwa eHe...nuulumo n'eHeperi niihimya “o-m-u-m-u-l-a”? Akavi ansuwela yeeyo, mw'Enkelesi? Vekeekhai. Nuulumo *sabbath* khanniiweya vootheiha? Ti siiso.

83 Nuulumo *oreeriha* khanniiweya vootheiha? *Oreeriha* nuulumo n'Ekreku. *Oreeriha* enihimya “okhalihwiwa oowaarya.”

eHeperi, nnihimya “okhaliha oowaarya.” Ekreku, nnihimya “oreeriha.” Enkelesi, nnihimya “okhaliha yoothuwa.”

⁸⁴ *Sabbath* enihimya “nihiku n’omumula.” Ti yeeyo yaari sabbath ya khalayi, nihiku n’omumula. Moonaru *omumula*, enihimya “sabbath.” Mphavele mwa soolepa sanyu soolikana, vairaneya wira muhaana Bibilia a Ekreku, nto musuwele vakhala wira nuulumo. . . Mwakhalana Bibilia Scofield, nwehe mwa s’osoma sa mukerekhere “omumula” nto moone sinto khinoottikiheryani wa *esabbath*. *Sabbath* enihimya “omumula.” Vaareera.

⁸⁵ Vano nwehe.

Tivo niikasoopeke, wira, natiri niroromelihiw’ahu wo ovolowa musabbath mwawe, omumula, . . .

⁸⁶ Vano, athu anci-ene antthariha mahiku, ntoko otthariha nihiku na sabbath *Saapatu*. Akina ankhalaha *Ettiminku* muluku eethiru, nihiku n’okokhorela. Nto ni mahala a Muluku, ni ni Masu a Muluku, Muluku akikhaliherye ohiy’ula, kinoowerya owooniheryani wira oowanli aya aavonya. Othene mulipa-ookokhorela Ttiminku ni namasuka *esabbath*, awo oowanli aavonya voomalela vanihimya Masu. Ni numala sothene, ti Masu nrin’ahu orowa ni yaawo, kahi n’ile Ativentista anihimya’aya, wala kahi n’ile muPrustante enihimya’awe, wala muKatolika enihimya’awe. T’ile Bibilia enihimya’awe.

⁸⁷ Vano, vano nwehe.

Maana owo oohimya nipuro nimosa mwaha wa nihiku na neethanu nenli, . . .

Vano ninrowa ohela etthu ntoko *ela*, ni niihane *ela—ela*, “Omumula wa Muluku,” nihiku na neethanu nenli.

⁸⁸ Vano nwehe. “Nto Muluku. . .” Nwiriyaneyo Yoolepwa vano.

. . . Muluku aahimumula nihiku na neethanu nenli miteko sawe sothene.

Muluku aahikhalana eSabbath, nto nihiku nlo na neethanu nenli naamanle miyaakha ekonto emosa, ethoonyeryo ya eMileeniyu.

Maana owo oohimya . . . mwaha wa nihiku na neethanu nenli, Nto Muluku aahimumula . . . ovara miteko sawe—sawe sothene.

Eporonoome ya mutthu, “Miteko *Sawe sothene*.” Owo aahimumula nihiku na neethanu nenli. Owo ti Muluku.

Nto nipuro nla (vathi va ikano), khanvolowa momumulani mwaka.

⁸⁹ Muluku aahimumula, v’erutthu, maana Owo aahipaka erimu n’ilapo ya vathi muhina mwa mahiku mathanu na mosa, nto nihiku na neethanu nenli Owo aahimumula ovara miteko *Sawe sothene*. Owo aahimumula miyaakha ekonto emosa. Maana

Bibilia oohimya, wira, “Nihiku nimosa mulaponi sinkhala miyaakha ekonto emosa Wirimu; miyaakha ekonto emosa Wirimu ninkhala nihiku nimosa mulaponi.” Akavi ansuwela wira Yoolempwa ennihimya yeeyo mwa Petru Anenli? Vaareera. “Muluku aahimumula nihiku na neethanu nenli. Ni Owo oohimya mwaha wa yeeyo nipuro nimosa.”

90 Vano nwiriyane oratteene.

Maana owo oohimya nipuro nimosa mwaha wa nihiku na neethanu nenli, Nto Muluku aahimumula . . . ovara miteko sawe sothene.

Nave nipuro nenla voohimmwa-tho, (ikano), khanvolowa momumulani mwaka.

Owo aahaavaha aYuta, ephiro aya erowaka muttette wa natiri, ahiiso, okhuma wEjitu mpakha muttette wa natiri, nihiku na neethanu nenli sabbath.

91 Vano nwiriyane.

Tivo woonaka wira akina anoovolowa, ni ale yaapacenrye olaleeriwa . . .

Omumula! Muluku aahaavaha ikano, nto esabbath yaari yooruma ya neexexe.

. . . khiyaavolonwe mwaha wo ohaamini: . . .

92 Vano nwehe. Owo onlavula mwaha wa ikano, moota yaarow'aya ovolowa, khisaatakanihiwe ni waamini. Awo khiyaasunke. Awo yaasuka esabbath ntoko muupuxeryo, wira yaarowa muttette wa esabbath, wira yakhalane omumula woohimala mwa mikattyamiho saya sothene ni mixankiho saya sothene, ohikhala-tho makapataxi, ohikhala-tho ohiyu wo ohimumula. Awo yaari mphironi erowaka muttette wa natiri wo omumula. Waakhwalala eleethi ni oravo. Iwuuva saari suulupale saana mpakha alopwana anli yaakux'aya nivara nimosa mmakhatani mwaya. Oh, muttette xeeni wa omumula wooreerihiwa! Masi yaahivonya ovolowa okathi aphiyaly'aya-wo, mwaha wo ohaamini waya. Awo yaahikhoottiwa, ary'ene ikilomo miloko mithanu na mosa ni xexe paahi okhuma vaakhumaly'aya wEjitu, erowaka muttette wa natiri. Nto yaahipisa miyaakha miloko mixexe wira ephiye-wo, mwaha wo ohaamini waya. Muluku aahaavaha profet'aya, aahaavaha ethoonyeryo Awe, aahaavaha Nripu na Mooro, aahooniherya ithoonyeryo ni sootikiniha, ni aahaalaleerya Ehapari yooreera. Vano awo yaahirowa, ehiyaka ihopa ni mikatthe, khumorela mothakoni. “Vano irutthu saya saahipweteya mothakoni.”

93 Yesu, v'ephattuweloni, Owo aahihimya.

Yiirale, “Axitiith'ihu yaahilya emana mothakoni, miyaakha miloko mixexe.”

94 Owo khwira, “MIYO KA Yolya y’Ekumi ekhumme wa Muluku a Wirimu. MIYO KA Yolya y’Ekumi. Moise khoovanheni Yolya yeeyo. Atith’Aka t’avanhe Yolya eyo. Nto MIYO KA Yolya enikhuma wa Muluku a Wirimu. Mutthu alyaaru Yeela, khankhwa.” Vo ti vavirikanne aya.

95 Vano nwehe. Awo yaahimye wira Owo... “Awo yaahiwurya vaMwala waari mothakoni, mwa okathi wa miyaakha *sinci-ene*.”

96 Owo khwira, “MIYO KA Mwala yoole.” Nttotopeliwe Nsina Nawe Noowaarya! “MIYO KA Mwala yoole.”

Vaaweryaneya sayi Owo okhala Mwala yoole? Mwala ole waari Mwala wa eroho. Owo waatthara aana a Isarayeli. Nto Moise aahikhalana ekopo mmatatani mwawe, yeeyo aari ttootto a olamula wa Muluku. Ni Muluku aahimuleela wira amane Mwala, vano owo aahimana Mwala. Nto vairaly’awe siiso, maasi yaahikhuma vaMwala. Ni Kristu aari Mwala yoole, ni olamula wa ehukhumu ya Muluku mwaha wa etampi yaahimorela Yoowo. “Muluku ohiiriha wira sootakhala sahu hiyo othene simmorele Yoowo,” ni sootakhala iyo soophuleiha murim’Awe. Nto okhuma vamurimani Vawe oomwarexa Eroho Yowarya, ntoko miratthi sa maasi, w’atthu yaapweteya, yaakhwa.

“MIYO KA Mwala yoole waari mothakoni.”

“Vano,” owo khwira, “Muntthuna ohimya wira . . .”

97 Owo khwira, “Moise, ole oohimenryeni yeeyo, owo aahiphavela woona nihiku Naka. Ni aahoono mwa epante.”

98 Owo khwira, “Vano, Nyuwo muntthuna onihimeerya wira mwa muulupale onvikana Moise? Wira Nyuwo moomoona Moise? Nto Moise iira akhwiye-ene miyaakha imiya thanu na tthaaru.” Khwira, “Vano hiyo noosuwela wira Nyuwo mookhalana munepa wootakhala,” mwa moolumo makina, mulolo. “Hiyo noosuwela wira Nyuwo mwa mulolo.”

99 Owo khwira, “Abrahamu ahinatthi okhala, MIYO KOOKHALA. Miyo kaari MIYO KOOKHALA MUULUPALE aari vamwiiwani waavarela. Miyo ka Mooro yoole waari vamwiiwani waavarela. Miyo ka Nlaikha nenle naarowa ohoolo waya.” Ni Owo khwira, “Miyo kikhumme wa Muluku, ni kintthikela wa Muluku.” Nto Owo aakhumme wa Muluku, khwiipaka erutthu khukhala ni hiyo; khutthikela Nripu nenle na Mooro.

Nto Owo ori vaava, ohiy’ula, n’uvira miyaakha ikonto piili, “mmosaru nsana, olelo, ni mahiku othene,” airaka etthu emosaru, aahoolaka an’Awe ooreerihiwa.

100 Nto anci-ene annirwa . . . annikela mwaha wo ohaamini. Vano, owo khwira, “Owo ookhaliha nihiku,” nihiku Muluku aamalin’awe muteko Awe. Vano, “Owo ookhaliha ‘nihiku nikina,’ mwaha wa yeela, wira awo yaiwa, awo yarwa,

ansuka mahiku a isabbath, ettharaka niira na mweeri wooneyaka ni sikina.” Ti vaavo axinna Ativentista amphavel’aya woottikiheriyani-vo.

¹⁰¹ Vano nrowe nitthikele osoma. Nwehe.

Tivo woonaka...wira akina anoovolowa, ni ale yaapacenyre olaleeriwa khiyaavolonwe mwaha wo ohaamini.

¹⁰² Vano, versiikulu 7. Oh, wulu! Miyo kinihimya wira, Yoolempwa ti yo wuupuxeriwa ni Muluku va matemaatika-vo. Kinihimya wira, Yoolempwa ti, ni mwa inamuna sothene, yoowuupuxeriwa ni Muluku. Matemaatika a Bibilia t’olikana.

¹⁰³ Mooweha wira Estadu Unid’ula ti nummaru muloko ni tthaaru mwa sothene siniir’awe? Moosuwela wira okhalihiwe ni ikolooniya muloko ni tthaaru? Moosuwela wira epantera yaarina ittheneeri muloko ni tthaaru woopaceryani? Moosuwela wira sothene Estadu Unidu oniir’awe siri mwa nummaru muloko ni tthaaru? Mwaahisuwela wira onkhumelela mBibiliani mwa Wiisuupulula 13? Vekeekhai t’onkhumel’aya. Nxeni naamukhaani, mwaapwittipwitthi aakhumme mmaasini, kahi suulupale ni mittitthi s’atthu,...kahi mmaasini, masi mutthayani, vaavo vahikhanle etthu. Aarina manyaka manli makhaani: owerya w’atthu ni w’etiini. Ni owo aari mwaapwittipwitthi: otaphuwa wa etiini. Nto nuvira okathi vakhani, yaahitakanxana nto owo aalavula ntoko ehanasi, ni aahooniherya owerya wothene Rooma ooniheny’awe owo ohinatthi. Ti yeeyo enrweela elapo ahu. Mulepe eyo. Nwehe Opatthana wa Ikereja ni aKatolika wiiraana vamosa, nto nwehe eniiraneya.

¹⁰⁴ Atthu antthara Nripu na Moore vekeekhai anoovira m’okathi woorika, masi awo aalikana wira ekuxiwe okathi ene yoowo, ti yeeyo, oolikana paahi wira erowe. “Maana Mwaapwittipwitthi ohaaxintta,” ohimye Bibilia, “n’ale yaamutthara Yoowo, okhala wira awo yaahiihaniwa okhala oothanliwa ni ooromeleya, Oothanliwa a Muluku.” Khaninrowa ovolowa mw’elaleeryo eyo y’eprofeta naanaano, wira nikelele ohoolo ni yeela.

¹⁰⁵ Nwiriyanane saana, ekapiitulu 7, e...kinihimya ekapiitulu 4, versiikulu 7. Thanu na piili nummaru na omaliha. Tthaaru nummaru na Ekumi. Thanu na piili nummaru na omaliha, nto ela emmaleliha esabbath.

“Nto emaara ekina,” muupuwele, owo oolavula, “Muluku,” mwaha wa yeela. Vano owo oolavula “ikano,” mwaha wa yeela. Vano nto, emaara ekina, “Owo aahithanla nihiku nimosa,” nihiku na neeraru, okathi wa neeraru.

Siiso, owo aahithanla nihiku, nihiku nimosa, ahimiyaka mwa Davidi, Olelo, nuvira okathi munci-ene;...Olelo, nuvira okathi munci-ene; ntoko

vahimmw'aya wira, Olelo nyuwo mwaiwa nsu nawe, muhuumihe murima anyu. (Nwehe.)

...vaari wira Yesu aahaavaha awo omumula (esabbath),...owo khaarowa ohimya-tho nihiku nikina.

Ihuhu sinrukunuwa ni Yesu Kristu: okhuma ikano okela mahala, okhuma miteko okela mahala, okhuma mw'etthu muniir'anyu okela mw'etthu Muluku iiraly'awe, wa iphwanelelo sanyu ahiiso iphwanelelo Sawe. Eyo yoorukunuwa.

¹⁰⁶ Okathi Moise waakhumaly'awe mothakoni, ni ikano, owo iirale, "Muhiraruwe. Muhiiye. Muhimwiive mutthu. Musukee nihiku na sabbath ntoko nihiku noowaarya." Okathi Yesu okhumaly'awe mothakoni...Okathi Moise orwiiy'awe, xetwani aahimweererya. Vamalakaruru xetwani omweererya, owo aahinwiriya. Moise aahikhalana nipuro noottettheya. Akavi ansuwela yaari exeeni? Ohiimaaliha. Nto amalakaruru owoona awo omukokhorela mwaanyompe a weero, owo aahirihela vathi sooruma khupwexa, ooniheryaka wira onamukutth'owo wammalamala. Vano Muluku aahinvaha-tho yaawo.

¹⁰⁷ Masi okathi Yesu okhummy'awe mothakoni, mahiku miloko mixexe atthukaka, Owo aahivoliwa etala, nipuro nimosu paahi noottettheya Owo aarin'awe. Vano xetwani aahirwa wa Yoowo khwira, "Nyuwo mwaari Mwaana a Muluku, mutatuxe maluku ala ekhale yolya. Nkapakani mwiiriirya va. Mukihiye kiwooneni Nyuwo opaka, nto kinoowaaminini."

¹⁰⁸ Yesu Khwira, "Yoolempwa wira, 'Mutthu khankhala mukumi ni yolya paahi, masi ni Masu othene ankhuma mwaano mwa Muluku.'" Owo khusuwela wira khakumanne ni Moise vale, maana Owo aaronwe wa Masu.

¹⁰⁹ Khimuroiha Owo nipuro noorekamaxa, empa m'olompa, khwira, "Nyuwo mwaari Mwaana a Muluku, mutuphele vathi vale." Nto *khuwariha*, kahi ohimya, masi khuwariha Yoolempwa. Khwira, "Yoolempwa wira, 'Owo onooruma Malaikha wira yookhapeleleni, wa yeeyo, wira nnawu Nanyu nihivulale vanlukuni. Owo onimookaphulani.'"

¹¹⁰ Vano Yesu aahirowa khulukama Masu, khumpwapwela.

¹¹¹ Khunweliha Owo vamwaako khumooniha Estadu Unidu ni Alemaanya ni Suwiisa, ni ilapo sothene sa molumwenkuni, saarowa okhala, khwira, "Sothene iyo ti sawaka. Kiniiriha etthu p'itthu entthun'aka." Khivanxankiha hiyo okhalanaka ikhotto ni mikattyamiho. Khwira, "Kiniiriha iyo..." Khivanxankiha athiyana owaraka...ni ohiirihiwa etthu, vathi va ikano. Sothene sineettiheriwa ni xetwani. Ti yeeyo Bibilia ehimmy'awe. Satana khwira, "Iyo ti sawaka. Kiniiriha etthu p'itthu entthun'aka." Khwira, "Nyuwo mwakikokhorela-ru, kinimookhalihani Nyuwo mwene ntoko miyo siry'aka."

112 Yesu khwira, “Yoolempwa, ‘Mwaakokhorele Apwiya Muluku anyu paahi, mwaarumeele.’ Khuma va, Satana.”

Mwaha wa zeeni? Yesu aahisuwela wira Owo aamuwora orithi seiyo oMileeniyuni nno wuulupale, okathi Omwene Awe waarow’aya orwa. “Othuna Wanyu wiireye vathi va ntoko Wirimu.” Khanrowa owariwa-tho akaputtula. Khunrowa okhala-tho owurya. Khunrowa okhala-tho wunlela ithu. Khunrowa okhala-tho oraruwa. Khunrowa okhala-tho okhwa. Khunrowa okhala-tho oxanka. Owo onoorithi ilapo sothene. Iyo ti Sawawe. Ti yeeyo. Iyo ti Sawawe, ni Owo onoorowa orithi. Masi Satana t’orina mwa ehuhu emosa y’okathi, okhanle olelo, hiyo ninkhal’ahu.

113 “Masi Owo oothanla nihiku, ahimyaka wira, ‘Olelo, nuvira okathi munci-ene.’ Ni khwira, ‘Muhuumihe murim’anyu.’”

*Tthiri vaari wira Yesu aahaavaha awo omumula, . . .
owo khaarowa ohimya-tho nihiku nikina.*

114 Munn’aka Ativentista, nkawehani Yeeyo. Paulo va, oohimya. Ni Paulo oohimya, mw’aKalasiya 1:8, vakhala wira munnilepa soolempwa, aKalasiya 1:8, “Nakhala Nlaikha ninkhuma Wirimu olaleerya ehapari ekina ohiya Ela yoolalenry’akani, atakhaliwe.” Paulo oohimya, “Vaakhanle wira Yesu aahaavaha nihiku n’Omumula. . .”

115 Nkawehani, okathi Owo okhumaly’awe vamwaako. Owo aahikhuruwa nto. Owo aahimuxintta xetwani. Owo aari oottikittheliwa, oolikana wira avare orumeyi Awe. Owo khwira, “Muhiiwa ele ehimmwe, ale a khalayi, ‘Muhiive,’ masi miyo kinooleelani wira ole oninviruwela munn’awe, vahikhanle mulattu, oomala omwiiva. Muhiiwa ele ehimmwe, n’atthu a khalayi,” nihiku nla, anamasuka esabbath. “Muhiiwa ele ehimmwe, ottuli wu khalayi, vathi va ikano wira, ‘Muhiraruwe.” Yaahaana okhala mowiirani, wira ettheke. “Masi Miyo kinooleelani, wira ole oninweha muthiyana anwereihaka murima ooraruwana muthiyan’owo mmurimani mwawe.” Yoovirikana! Yaahivira vasulu yooruma eyo ya neexexe. Masi Owo aahaavaha Omumula?

116 Nrowe noone etthu aahimaly’awe. “Davidi iirale, ‘Nuvira okathi munci-ene onimoorwa Omumula wooloka.’” Muluku aahimumula ovara miteko Sawe, nihiku na neethanu nenli. Muluku aahireeriha nihiku na sabbath, khwaavaha aYuta mothakoni, siiso. Awo. . . yaavolonwe mwaha wo ohaamini, okhala wira Masu khiyaatakanishiwe ni waamini. “Nto emaara ekina, Owo oothanla nihiku nimosa, ahimyaka mwa Davidi, ‘Nuvira okathi munci-ene.’”

Miyaakha imiya sene Davidi n’ukhwa, Mwaana a Davidi aamuhihimuwa, yoowo okhanle Yesu, “Nto awo yaiwa Nsu Naka, muhuumihe murim’anyu.” Muluku onrowa olavula ni murima.

117 Vano nwehe, wa eversiikulu 9 vano, wa nyuwo munsoma. “Yesu aamwiira aavanhe-ene omumula,” versiikulu 8, “Owo aamu. . . aamuhimya nihiku nikina.”

118 Vaakhanle wira ekhale esabbath, vaakhanle wira nisukiweke nihiku na Ettiminku, weso Owo aamwiira ohimmye-ene yeeyo. Vaakhanle wira Owo aahihimya, “Vano khekhanle-tho esabbath, khokhanle-tho osuka nihiku na neethanu nenli, ele Miyo entthun’aka wira musuke Ettiminkuu,” Owo aamwiira ohimmye-ene. Paulo ohimmye wira Owo ohiira. Owo aamwiira ohimmye-ene, “Nyuwu othene mukokhoreleke Ttiminku. Owo onookhala omumula.” Ahe, vaakhanle wira Owo aathunenle awo osuka esabbath, Owo aamuhimya wira, “Mukhale musukaka nihiku na neethanu nenli paahi. Masi vano Miyo kintthuna wira musukeke Ettiminku, nihiku na neethanu neeraru.” Nnari. Owo khonahimyeke.

119 Owo ohimmye wira, “Vaari wira Yesu aahaavaha nihiku nimosu, Owo khaarowa ohimya?”

120 Vano versiikulu 9. Mulikane.

Siiso nlelo onnihala omumula w’atthu a Muluku, osuka esabbath w’atthu a Muluku.

Maana ole ovolonwe mwawawe (wa Kristu) omumula wawe, oomumula miteko sawe, ntoko Muluku omumunly’awe sawawe, sabbath.

121 Munnoona? Vano nrowe nikuxe Soolempwa kamosa-kamosa nilipiherye yeela. Vaareera. Okathi Muluku opakaly’awe olumwenku muhina mwa mahiku mathanu na mosa, owo aahimumula nihiku na neethanu nenli, ni khaatthikenle-tho ovaru miteko. Nittottopeliwe Nsina n’Apwiya. Owo aahiteka olumwenku, khuhela soopattuxiwa memmo, khurwa omumula; nto khonatthike-tho, wira ateke-tho olumwenku mukina. Owo aahimaliha miteko, khurwa omumula. Vano, mwa. . . Nto, nuvira miyaakha iyo ikonto sene, nto etampi yaahikela; vano Kristu aahithoonyeriwa, Mwaapwittipwitthi aahithoonyeriwa. Vano, aYuta yaavahiwe ela ntoko ethoonyeryo ya Omumula wa nihiku na neethanu nenli.

Vano, *owo* oothanla *nihiku* nikina, *ahimya* mwa *Davidi*, . . . *nuvira okathi munci-ene*, onnoorwa omumula mukina.

122 Vano Omumula iwo t’uvi? Mukhunle ni miyo Matewu, kapiitulu 11, nto epantte yookiserya ya kapiitulu 11 ya Matewu Oowaarya. Owo okathi Yesu aamalihal’awe elaleeryo Awe vamwaako, nto munimoona etthu Owo aahimmy’awe.

123 Owo iirale, “Ole oninweha muthiyana, anwereihaka murima, ooraruwana muthiyan’owo mmurimani mwawe. Ole oninviruwela munn’awe, vahikhanle mulattu, oomwiiva

munn'owo." Itthu iya sothene, ni Owo khonakwanyeke yooruma eyo ya neexexe, esabbath iyo.

¹²⁴ Vano Owo onoomaliha. Nto eSabbath ti Natiri muulupale a Muluku. Omumulaa. Vano, vano nwehe va, okathi Owo omalihaly'awe mareeriho. Va Owo onihimya, versiikulu 27 ya kapiitulu 11 ya Matewu Oowaarya. Vaavo, Owo aaxuttih'awe mareeriho mukapiituluni 5.

Itthu sothene kivahiwe mmatatani mwaka, kivahiwe n'Atithi: nto khaavo onimusuwela Mwaana, ehikhanle Atithi; . . .

Moone, khamukhanle omusuwela mmosa muhimusuwenle mukina, okhala wira Owo aari Atithi owiisooniherya mw'erutthuni.

. . . nave khaavo onaasuwela Atithi, ahikhanle Mwaana, . . .

¹²⁵ Enkhala ntoko atthu yaamuwerya woona Eyo n'uhivaanyihana. Vekeekhai. Muluku kahiyo Atthu araru. Vakhala wira Owo t'aMuluku araru, weso hiyo n'apakawu. T'uvi okhanle Muluku? Awo ti, araru othene, Muluku mmosa, ti miteko miraru sa Muluku mmosaru. Owo aari Atithi, mwa mukhalelo wa Eroho Yowarya, mwa Nripu nle na Mooro mothakoni. Owo aari Mwaana, okathi Owo aarumenly'awe muteko w'oMwaana. "Woohala okathi vakhani nto olumwenku khunikoona-tho; Miyo kinoorowa. Kinimoorwa-tho kikhale ni nyuwo, hata mwa nyuwo, mpakha omala olumwenku." Munnona? Owo ti oTiithi, oMwaana, ni Eroho Yowarya, nave. Sothene ti Muluku mmosaru avaraka muteko mwa miteko miraru soovirikana: oTiithi, oMwaana, Eroho Yowarya. Nnakhala. . .

Yohani Oopacerya 5:7 oohimya, "Maana ari araru ankhalela onamoona Wirimu: Tithi, Mwaana, Eroho Yowarya. Ooraaru ala ari Mmosa."

¹²⁶ Tome aahimwiirela, "Pwiya, nooniheryeni Atithi." Eyo enoophiyerya.

¹²⁷ Owo khwira, "Kookhala mahiku manci-ene ni nyuwo, nto khamunkisuwela?" Khwira, "Mwaakoonaka Miyo, muniwoona Atithi. Vano munihimya sayi wira, 'Nooniheryeni Atithi?'"

¹²⁸ Vano, ale a Omosa arookuxa, nikhuru n'atthu na omosa, nto aneererya omukhaliha Tithi, Mwaana, ni Eroho Yowarya, ntoko muteko mmosa paahi ni nipuro nimosa, ni ntoko ekatha anyu, emosa. Ti yoovonyeya. Muluku khaakhanle. . . Yesu khaakhanle okhalaka tiithi Awe Yoowo. Vakhala wira aahikhala, weso Owo aari e. . . Ahe, vaaweryaneyaya sayi Owo okhala tiithi Awe Yoowo?

¹²⁹ Nto vakhala wira Muluku mutthu, oovalaana ni Eroho Yowarya, Owo aarina atiithi anli. Maana Bibilia ohimnye, wira, "Eroho Yowarya yaahimukhuneela Maria vano owo khurupala." Ni Bibilia oohimya, mwa Matewu 1:18, wira, "etthu ile erupaliwe

mwa yoowo ti ya Eroho Yowarya.” vano t’uvi okhanle tiithi Awe, Eroho Yowarya wala Muluku? Oowanli, Eroho emosaru, weso Owo aarina oyariwa woohiphwanela ni irooho piili.

Nlo nikanano n’eKatolika, ni khonakhaleke mwiixuttiho wa Bibilia. Martinho Lutero aahiruua yeeyo akhumaka, ni eKatolika yinci-ene ekina eri mukereja Luteraano. Wesley khukelela ohoolo ni yeeyo. Nto eyo nlelo enoorowa, masi ti yoovonyeya. Kehiyo Ekeekhai. Khenakhaleke, khonakhaleke Mwiixuttiho wa Bibilia. Khenakhaleke yooruma mBibiliani, owiixuttiha aMuluku araru.

Ori Muluku mmosa. Yesu ohimye wira, “Mwiiwe, Isarayeli, Miyo k’Apwiya Muluku anyu, Muluku mmosa,” kahi aMuluku araru.

¹³⁰ wAfrika, ampatisa vamosa wa Atithi, vamosa wa Mwaana, ni vamosa wa Eroho Yowarya. Vano nto muYuta oohaawa onoorwa, wira, “T’uvi w’awo okhanle Muluku anyu? T’uvi okhanle, Tithi, Mwaana, wala Eroho Yowarya?” Awo ti, othene araru, Mmosa. Bibilia ohimye wira yaari Mmosa.

¹³¹ Yesu aari empa Muluku aakhal’awe-mo. Bibilia ohimye yeeyo—yeeyo, Timoteyo Oopacerya 3:16, “*Vekeekhai*,” (eyo ti wi, “yoohimya”) “esiiri ya nttittimiho ti yuulupale. Wira Muluku ohiisooniherya mw’erutthuni, ohooniwa ni Malaikha, ohaakheliwa...oolaleiwa, khwaaminiwa, ni ohaakheliwa Movuwani.” Muluku aahikhala. Bibilia aahihimya, “Nsina Nawe onrowa wiihaniwa *Emanuweli*, nenlo nintaphuleliwa, ‘Muluku ni hiyo.’” Bibilia oohimya, wira, “Yesu, mwa Yoowo waakhala omalela w’oMuluku mw’erutthuni.”

¹³² Ntoko saahimaly’ahu ohiyu uwo: Muluku, woopaceryani, aari Eroho. Vano nto, wa Muluku, yaahikhuma Logos, wala teyofaniya, yeeyo yaari mukhalelo wa mutthu, aihaniwa Mwaana a Muluku, ookhala ntoko. Owo aahirwa elapo ya vathi, mw’erutthuni y’ethayi, hata Owo ahinatthi orwa mwa Yesu Kristu. Vano mmirye yeeyo emaara emosa, munna. Miyo kinoowooniheryani.

¹³³ Okathi—okathi Moise omoonaly’awe Yoowo. Owo iirale, “Mukitthuniherye koone mukhalelo Anyu, Pwiya.” Nto Muluku khumwiiipitiha mmwala. Nto okathi owo ovinry’awe, owo khwira, “Yaari epantte y’ottuli ya mutthu.” Eyo yaari Teyofaniya. Ti yeeyo voolikana.

Vano, Teyofaniya eyo yaahaana opakiwa erutthu. Kahi Mutthu mukina, masi Mutthu mmosaru aahaana okhala erutthu, wira okumihe mpunu wa okhwa.

Ntoko enwi okathi enlum’aya, enihiya mpunu. Ni owo khaahiyale eyo. . .Owo waaniwerya ohela mpunu mw’erutthuni ya mutthu okhala wira etampii. Masi, munna, okathi olummy’aya erutthu ya Emanuweli, owo aahipwetexa mpunu

aya. Ayo, mulopwana. Owo pooti oruma masi khorina-tho hata mpunu.

134 Khivanxankiha, Paulo, okathi waaronw'awe ohitiwa muru, iiraly'awe, "O okhwa, mpunu anyu ori vayi? Nyuwo pooti oruma ni orunya ntoko sintthun'anyu. Mahiye, oxintta wanyu ori vayi? Masi nimuxukhuruku Muluku yoowo onnivaha oxintta mwa Yesu Kristu." Eyo eri vo.

Aathuneieye Muluku Mwaneene wira aire eyo. Owo aahirwa khwiisooniherya mw'erutthuni. Owo khutthika mwa Eroho.

135 Nyuwo muniira, "Munna Branham, nyuwo khimunanileele, nlelo, okathi xeeni Muluku aipank'awe erutthu Owo ohinatthi orwa mwa Kristu."

Okathi Abrahamu aakilanth'awe vathi v'eheema, nihiku nimoso, yaahirwa Malaikha manli ni Muluku, emurweelaka yoowo, mwa erutthu ya mutthu. Awo yaahikhalanasa nthupi mukuwoni mwaya ni yaahikhulumuwa, vano khukilaathi. Nto Abrahamu aahikhuma khimukuxa mwaanyompe a enyompe y'othiyana, khumwiiva. Ni khooxa ehoce ya mwaapwittipwitthi. Khurowa khukuxa...khumwiirela Sara okuxa otthu wa nakuwo khuveera, khupaka mikatthe. Khukuxa manteeka a enyompe, khukuxa eleethi yootikana. Nto khuroiha vale khupweha, vano Muluku khulyaaka.

136 Aleluya! Mwaha wa yeeyo, "Waamini waka onweh'aya wa Nyuwo, Nyuwo Mwaapwittipwitthi a oKalvario."

137 Nyuwo munuupuwela wira eyo etthu yuulupale wa Muluku? Muluku, Yoole opanke epotaasiyu yothene ni ekalsiyu, ni itthu sothene mulaponi, Owo aahikhuruwa khimuxekurya Abrahamu. Owo khwira, "Munuupuwela wira kinimoovitheryani, woonaka wira nyuwo mwa mulipa-oorithi elapo?" Amen. "Miyoy nkinrowa owiipitheryani." Muluku paahi aakuxale e . . .

138 Hiyo nimpakiwa ni itthu muloko ni thanu na mosa. Owo aakuxale paahi epotaasiyu vakhani, ni ekalsiyu vakhani, patarootya vakhani, waarya wa molumwenkuni, khwira "Wish!" "Mukele mme, Kapiriyeli," erutthu!

139 "Wish!" "Mukele mme, Owaawa." Nlo khukela-mo.

Malaikha manli, a Wirimu!

140 Muluku aahookola ntata khukuxa nikuphi nimoso na yeeyo, "Wish," khukela memmo, Mmansawe. Khukhuruwa, ni aahivoliwa etala. Attotopeliwe...Ankhi yeeyo, axinna Ativentista muhinikhuura enama? Ninoorowa ophiyerya yeeyo, okathi vakhani. Muluku Oowerya sothene, Yehova, mphavele vakhala wira Nsina nenlo khanitaphuleliwe ntoko Ole vamwiiwani waavarela! Aleluya!

Nto okathi Owo eemenly'awe elapo ya vathi, Owo aahihimya, "Abrahamu ahinatthi okhala, MIYO KOOKHALA, Mmosaru

yoole vamwiiwani waavarela.” Ti yeeyo, Elohim, moone ahaakhanle mmosaru. Owo aari Ole aari vamwiiwani waavarela.

141 Owo aari Ole va ohoolo w’Abrahamu, mw’erutthuni y’ethayi, aamukhuurale mwaanyompe, ni khiwurya eleethi ya enyompe, khulya manteeka mmikattheni. Nttottopeliwe Nsina Noowaarya na Muluku! Khweetta mpakha vale khwira, “Miyu nkinihiya . . .”

Nto Owo aarukunuwenle ettuli. Owo khwira, “Abrahamu, kinoorowa woosexekuryani, ni munoorowa okhalana mwaan’owo. Murina miyaakha emiya vano, ni Sara miloko mithanu na mixexe.” Ni Saara, muheemani, khwira, “Ha!” khutheya. Owo khwira, “Exeeni emutheihale Saara?” Ottuli Wawe; eheema eriyari aya.

142 Abrahamu khwira, “Saara, murootheya?”

143 “Nnari, nnakhala.”

144 Khwira, “Ayo, mootheya.” Muthinto xeeni w’osoma muupuwelo okhanle ole? Muthinto xeeni w’esomelo ya miyuupuwelo waari uwo?

Owo onniira etthu emosaru olelo. Owo ti Yehova-yire, Yehova-rafa, mmosaru nsana, olelo, ni mahiku othene. Owo khonavonyeke.

145 Nkanweheni Yoowo. Owo eemenle vale. Khweetta arowaka vale khulavula n’Abrahamu; vano khulakaseya, ohoolo wawe. Nto muhatiithi muulupale Abrahamu ohimmye wira owo “aahilavula ethoni n’ithoni ni Muluku, Elohim,” Muluku mmosaru. Munniiwa? Kahi Atthu araru, munna. Miteko miraru sa Mutthu mmosaru!

146 Woopaceryani aari yoowo mmosaru, Owo aari Eroho ele yuulupale, Ephattuwelo vaavo ekeekhai yothene, ophenta wothene, murettele wothene. Itthu sothene saari sooloka saari mw’Ephattuweloni muumu. Eyo khupacerya opakeya erutthu, teyofaniya, muthinto w’erutthu hiyo onrowel’ahu. Kahi erutthu yoovuwihwiwa, masi erutthu ntoko, ya nlaikha; erina mukhalelo, ekhove.

147 Khula okathi onoon’aka mwiri, kinnuupuwela, “Mwiri ule ti enekatiivu. Yookhala epositiivu nipuro nlo.” Mwiri ule opakiwe n’itthu. Wookhala osuwela omosa opanke. Ni yothene elapo ela eniir’aya wooniherya ele ya Wirimu. Bibilia ohimmye siiso. Nto vakhala wira wookhala mwiri va orina opweteya, wookhala mmosa Movuwani ohinrowa opweteya.

148 Kaamoonaka mulopwana, kinniwoona anaitthoko oophenteya, mulopwana ni mwaar’awe, yeettasaka mphironi, oosivelanasa, eyo enooniherya-ni? Nttottopeliwe Nsina n’Apwiya! Wookhala mmosa Wirimu ohinkhalakhala opweteyaka. “Emp’ela ya vathi va yakurumuwa vale, nookhalana emosa ennipelela,” teyofaniya.

149 Vano munoovara oraaru: Eroho yuulupale, ekhalaka mwa Mwaana, Yesu; Yesu akhalaka muKereja. “Nihiku nenlo, munoosuwela wira Miyo kiri mw’Atithi, Atithi mwa Miyo, ni Miyo mwa nyuwo.” [Nipuro vahiitthu mufiitani—Mol.] Sothene aari Muluku, Owo aayeehenrye mwa Yesu; sothene aari Yesu, Owo oyeehenrye muKereja. Eyo vo. “Miyo mw’Atithi, Atithi mwa Miyo; Miyo mwa nyuwo, ni nyuwo mwa Miyo.” Vo ti vari e—vo ti vari Erutthu.

150 Owo t’okhanle mulattu n’ekereja. Awo anooxuttihiwa mwiixuttiho mmosa, w’ethiru, wowoolowa wa khalayi, anoottiyawa nno ni nno n’ukhalana omulya soopa ni meera a iturufu. Khivanxankiha nrin’ahu evitikavitika ela nrin’ahu. Khaninthuna iporokrama s’anamwane ni waalya asoopa ohiyu. Entthun’ahu Ehapari yooreera ya khalayi ya ikuru, ni atthu a waamini ni xoowa okumihiwe vale, otharimulaka. Entthun’ahu olelo, kahiyo teyoloxiya eethiru ni muupuwelelo soopakiwa nnikhuru n’atthu. Nintthuna Ehapari yooreera ya ikuru enlaleiwa moWaaryani ni Owerya ni wooniherya wa Eroho Yowarya.

151 Nwehe va vano.

Ntoko owo sihimaly’awe, owo oothanla *nihiku* nikina, *ahimyaka mwa Davidi*, . . .

. . . *vaari wira Yesu aahaavaha awo omumula iwo*, . . . *owo khaarowa* . . . *ohimya-tho nihiku nikina*.

Masi *onnihala* . . . *omumula w’atthu a Muluku*.

Maana ole ovolonwe m’omumulani mwawe, . . . *oomumula miteko sawe, ntoko Muluku aamumunl’awe sawawe*.

152 Vano ninrowa osoma vayi? Matewu, miloko miili- . . . Kapiitulu 11, versiikulu 27.

Itthu sothene Atithi akivahaly’aya, koovahiwa n’Atithi, kiireke: nto khaavo ommusuwela Mwaana, ehikhanle Atithi; (Vaareera.) nave khaavo onaasuwela Atithi, ahikhanle Mwaana, n’ule Mwaana ontthun’awe omusuweliha.

153 Moone, kuhiyo moota xeeni oniixutt’anyu, moota xeeni pi—pixipu ontthun’awe wira musuwele. Ti moota Muluku ontthun’awe wira musuwele. Mwaahiweryeke wooka Muupulul’ola, muhinvekele pixipu. Munvekele Muluku. Muhaavekele apastore anyu. Munvekele Muluku. “Mwaana t’onimuupulula Owo,” *Owo*, epronome ya mutthu.

154 Nwiriyaane. Ela enimooxankihani. Va eri yooruma. Paulo ohimmye wira, “Owo aahin’ye—ru nihiku nikina, Owo aamuhimya.” Masi ela t’ile ehimmy’awe.

Murwe wa miyo, nyuwo othene mulemeliwe ni muhaaxiwe, miyo kinimoovahani esabbath, omumula.

Mukuxe ekheero aka, nave mwixutte sa miyo; kirina murima woomaala ni oowiyeviha: nto munoophwanya esabbath mmunepani mwanyu.

Okhala wira ekheero aka ti yookhweya, ni miritti saka ti sooveya.

155 Nwehe ele Paulo ehimmy'awe.

. . . vaari wira Yesu aahaavaha awo omumula iwo, . . . owo aamuhimya nihiku nikina.

Masi owo oothanla ni . . . nihiku, khuhimya mwa Davidi, . . . nuvira okathi munci-ene; . . . nyuwo mwaiwa nsu nawe, muhuumihe murima anyu.

“Nto onnihala . . .” Nwiriyanano vano, versiikulu 9.

Siiso onnihala omumula, esabbath, w'atthu a Muluku.

Maana ole, mulopwana wala muthiyana, ovolonwe momumulani mwawe . . .

“Murwe wa Miyo, nyuwo othene mulemeliwe ni muhaaxiwe. Miyo kinimoovahani omumula.”

. . . oomumula miteko . . . sawe, ntoko Muluku aamumun'awe sawawe.

156 Siiso nyuwo murineene miyaakha miloko miili. Siiso murineene miyaakha miloko miraru. Siiso murineene miyaakha miloko mithanu. Masi minuutu ene yoowo muniiw'anyu Nsu na Muluku omana vamurimani vanyu, muhuumihe. Vano nvolowe . . . “Ole oniwa Masu Aka, onimwaamini Ole okirumme, ookhalana, Ekumi Ehinimala, ni khankhalakhala akelaka molamuliwani masi oovira mookhwaani khuphwanya Ekumi.”

157 “Muniira, Munna Branham, xeeni eniiraneya?” Munaakhela Eroho Yowarya. Kristu onookela mwa nyuwo. Eyo ekeekhahi?

158 Mukhunle ni miyo mwa Yesaya, kapiitulu 28, nto nrowe nisome. Yesaya, kapiitulu 28, noone ele profeta ohimaly'awe ya yeeyo. Matewu . . . 28, opacerya versiikulu 8. Va eri yoohimmwa ya mahiku ookiserya. Nihaana omaliha muhina mwa minuutu mmosa.

Maana meesa othene anookhala, t'osareya marapheyo ni . . . khanikhanle nipuro nooreera.

159 Mukihiye keemele minuutu mmosa. Ntoko Ernie iiraly'awe ohiyu umosa, owo aalavula ni mutthu. Ernie Fandler, munn'ola va a oSuwiisa, owo khwira, “Miyo khweemela khuhiya okela muhina.”

160 Kintthuna wira ela ekele muhina.

. . . khanikhanle nipuro nooreera.

Maana meesa othene anookhala oosareya marapheyo . . .

Ni ntoko *mwalapwa* onrow'awe *vamarapheyoni* vawe...*ni ekuluwe*...vamaroveni *vaya*, siiso athu anoothika.

¹⁶¹ Mulattu xeeni ni nyuwo aMetotista? Mwaanikhalanaka Waarya. Exeeni yiiraneeye? Muluku orookumiha mmatatani mwanyu, Owo khwaavaha aNasareeno.

Exeeni ewinreni nyuwo aNasareno? Mwaahitoko okhalana Waarya. Muluku khukumihha mmatatani mwanyu khwaavaha aPentekosite. Voolikana. Nyuwo ekereja ya Muluku ni nyuwo akina athu a osantu, okhala wira murookhootta Waarya, nyuwo khwiitthokiha mmansinyu khwira, "Hiyo khaninrowa waamini yoovikana *ela*," Muluku khukelela ohoolo khuwoonihani wira Owo aahikhalana athu yaarowa omuthara.

¹⁶² Exeeni ewinreni nyuwo aPentekosite? Mwaahikhalana Waarya. Muluku khukumihha wa nyuwo.

Nripu na Mooro nnootthikela nirowaka. Khula okathi Nripu na Mooro neett'aya, Ekereja yaarowa ni Nenlo.

Nto okathi Lutero oitthokihaly'awe, akhumaka mukereja Katolika, ekerej'awe, Nripu na Mooro naahirowa nto Wesley khurowa ni Nenlo.

Wesley khwiitthokiha khupaka muromolelo awe, nto Nripu na Mooro khurowa vano aNasareeno khurowa ni Nenlo.

aNasareeno khwiitthokiha, nto ekereja ya Muluku khurowa ni Nenlo; ni khuhimya wira awo khayaari muromolelo, masi yaari yoowo.

¹⁶³ Vano exeeni ekhumelenle? Etthu yootharelana ekhumelenle, aPentekosite yaahoonna Mooro, vano khikhuma. Nto nyuwo mwiirale exeeni? Khupaka mwiixuttiho wa ilavulelo, vano khutthokiha, "Athu othene yaahaana olavula ilavulelo awo ehinatthi waakhela Eroho Yowarya," vano Muluku khurowa naanaanoru khoohiyani nyuwo mukilanthene-ene vaavo mwaary'anyu-vo.

¹⁶⁴ Exeeni ewinreni nyuwo a Omosa? Nyuwo muroophwanya opatiiso, mwa Nsina na Yesu. Nyuwo khupaka mwiixuttiho wa yeeyo, nto khwiivalaaniha n'ale akina, vano Muluku khukhuma naanaanoru khoohiyani mukilanthene-ene vaavo. Khweeli.

¹⁶⁵ Exeeni ewinreni nyuwo Asempeleya de Deus, Muthukumano Muulupale wa khalayi? Nyuwo muroopaka mutthenkeso wawinyu, vano Muluku khukhuma naanaanoru nto khoohiyani mukilanthene. Nto vano khamuhiyo hat'etthu woohikhala nikhuru, nooriirya nookhaleleya ntoko siry'aya ale akina.

Vano Nripu na Mooro nnookelela ohoolo. Aleluya!

...*meesa othene t'osareya marapheyo*...

¹⁶⁶ Nkawehani Olya w'Apwiya. Vano, awo hata... Kaahikhala nipuro nimosa awo ankux'aya ephawu pure. Ni ephawu ene

ehaana opakiwa yoohikhalana miropo. Nto anaavaha anatampi, anammulya sikaro, anamuttompe, anamararuwa, vakhalaru wira aakhalana nsina naya muliivuruni.

¹⁶⁷ Ni nyuwo aPatista hata muniihana ekomunyawu “yoowaliwa.” Vano, nyuwo aPatista murune vakhani, Muluku onookumiha opena wanyu. Eyo ekeekhaii volikana, khamunrowa owerya opena. Ekomunyawu “yoowaliwa,” munimwiivalaaniha mmansinyu, wooneyaka okhala ntoko oowaarexa muhikhanly’anyu.

Muupuwele, ela etapernakulu Patista. Ti yeeyo mumphwanyaanyu, yeenyu munimwiithokiha. “Oh,” muniira, “hiyo khanihiyo mutthenkeso.” Ayo, mwa yoowo. Vekeekhai, mwa yoowo. Muniira, “Hiyo wa opatthana.” Ayo, wa khula mutthu onrwa onkela vamukhora ni oniixuttiha paahi enamuna sinaamini anyu, ti vooreera. Masi, mmosa, nyuwo—nyuwo khamunrowa omurihela, masi munoomoomola mwa oxinn’anyu. Eyo ekeekhaii volikana. Oh, mookhalana enamuna yo wira. Ni Muluku ookhalana enamuna yo wira. Masi Ekereja ya Muluku enookelela ohoolo. Nripu na Mooro khaninrowa ovilela eyo.

. . . *meesa othene t’oseraya marapheyo* . . .

¹⁶⁸ Vano nwiriyane. Vano ela enoorowa wooxankihani minuutu mmosa paahi. Nwiriyane. Kinrowa osoma Masu. Aari pani ula? Profeta, Yesaya.

. . . *meesa othene t’osareya marapheyo* . . . mpakha *ohikhala* hat’etthu *yooreera*, ti mwalapwa onimukhuura mwalapwa paahi.

¹⁶⁹ Animoorwa okereja: athiyana animwiithikila, anoomettha maihi aya, anaawara akaputtula, okhuma owoona alopwana erwaaka mphironi; anookhala ethikilaka malaxi mukwhipi, axiruusi anthhuna omwiiwa mutthu owoopela muturi ule wa mwalapwa wala mwiici, etthu p’itthu, moosuwela, “Wush-wush!” Oh, munuupuwela wira khamureere oreera, kahi siiso?

¹⁷⁰ Ni nyuwo alopwana muneetta mphironi, ni sikaro mwaano, nave tiyaakono munikhuruni n’anamahoolela. Munkhala ntoko tooru oohikhalana manyaka a oTexas. Nto vo munuupuwela wira mwa mutthu. Eyo ekeekhaii volikana. Khivanxankiha meesa othene. . . Ovira ni waakhela ekomunyawu, ni wira ntoko mwa mutthu, ni owoka ni wiya ni wootha, esumana yothene. Zeeni mulattu ene ni nyuwo?

. . . *meesa othene t’osareya marapheyo* . . .

¹⁷¹ “Oh, kinnaakhela Olya w’Apwiya. Vekeekhai, hiyo ninniira mukereja mwahu. Yesu ohimye wira Owo aamurowa onihihimuxa mahiku ookiserya naakhela—ru Olya w’Apwiya.”

¹⁷² Masi, “Ole onikhuura ni onwurya ahiphwanelaka, onikhuura ni onwurya ehukhumu awe mmansawe, ahithokoreryaka Erutthu y’Apwiya. Ti vaavo anci-ene

vakhanly'aya aretta ni oohilipa eriyari anyu, ni anci-ene ari ookhweene," ikereja, sa khalayi, sookhwa sookhaleleya. Eroho ya Muluku yookhuma wa nyuwo. Nripu na Mooro khanikhanletho vo. Munnikhootta ovoniha w'eMuluku. Munnikhootta ohihimuwa.

173 "Oh," muniira, "oh, Owo oohihimuwa mw'alipa-ookhwa, mwa ehantisi." Ahe, ankhil Owo okhala mmosaru olelo, vakhala wira Owo oohihimuwa mw'alipa-ookhwa? Nyuwo muniira, "Oh, kahi siiso." Vano, eyo vo. Murina ohihimuwa mwa enamuna onthun'anyu, nave Muluku orina mwa enamuna Owo onthun'awe.

174 Masi, etthu ene ti, Bibilia oohimya, ele ensuwel'ahu wira ti Ekeekhai, wira Owo aamulipiherya Masu. "Nto itthu iya Miyo sinvar'aka nyuwo munoovara seiyo. Ni Miyo kinookhala ni nyuwo mahiku othene, mpakha omala olumwenku." "Yesu Kristu mmosaru nsana, olelo, ni mahiku othene." Ti yeeyo Masu ahimaly'aya.

175 Vano esabbath exeeni?

. . . *meesa othene t'osareya marapheyo . . . hata nimosa nooreera.*

T'ani onrow'awe omwiixuttiha ankhili?

Kahi ankhili a molumwenkuni; ankhili a muroohoni!

T'ani onrow'awe omwiixuttiha ankhili? . . . t'ani owo onrow'awe omukhalaha . . . omutaphulela mwiixuttiho?

176 "Oh, attottopeliwe Muluku, mutthenkeso ahu khonaamini Ila. Awo khiyaarowa ovilela Eyo." . . . nkincala ele mutthenkeso anyu onaamin'aya. Masu a Muluku anihimya exeeni wa yeeyo? "Oh, ahe, mapastore ahu, moosuwela, t'osoma." Oh, khweeli. Vekeekhai, khareere osoma vanci-ene, mpakha vamukumihaly'aya Muluku mmo. Tthiri, okhala wira nyuwo pooti waahimeerya Masu nto awo animweetta erowaka ni wira, "Ahe, miyo nkinaamini Iyo siiso." Oh, nyuwo oowoolowaseya! Mukihiye kooleleni.

177 Nkawehani va.

. . . *t'ani owo onrow'awe . . . omusuweliha mwiixuttiho? ale ahihiwe waamwa, ni . . . ale attharuxiwe nipele, ni akumihive vamapeleni.*

178 Nihiku nlo, namwaattamanani aka mmosa aahirwa. Owo khwira, "Billy, pastore mmosa opooma nno, mutthu mmosa oophenteya mutonko anyu omoona . . ." Khwira, "Amwaar'aka ni miyo naarookilaathi niwanre-ene ipixama, ntoko ohiyu eriyari, nto pastore ole mwaamukhaani khuvolowa ni owo—owo—owo khuwurya ekafe ni hiyo vano khurowa empa ya namwaattamanani mukina, khuvahana matata n'awo. Awo yaarina musewe mmosa a iturufu, vano owo khukilaathi khunattikha iturufu ni yaawo." Khwira, "Oh, owo aari mutthu

oomalela wiiraaneya n'atthu mutonko anyu omoona." Khwira, "Oh, hiyo ninnimphenta. Hiyo khinaakhanle wiikumihaka owo ni hat'etthu."

¹⁷⁹ Miyo khweemela vaavale okathi vakhani, khuupuwela, "Ahe?"

¹⁸⁰ Khwira, "Oh, khamunuupuwela wira khula ekereja ennimutthuna mutthu ntoko yoole?" Huh! Miyo nkaawerya waakhula eyo. Owo khwira, "Nipuro nikina naamukhaani," khwira, "awo yaahikhalana nipuro nimoso noophenteya. Murumeyi ula ni mwaar'awe, atthu oophenteya, yaaroorowa khweetta n'anamwane vanci-ene mpakha awo okhalana e—exikola ya Bibilia." Nto khwira, "Awo yaahikhalanexa, khusariha etthu iyo n'axinamwane." Khwira, "Wulu, owo onniwerya waatharihela inamuna sothene sa ihantisi sikhaani axinamwane."

¹⁸¹ Miyo khwira, "Eyo ti yooreera. Eyo ti yooreera saana."

¹⁸² Miyo khutthika. Kinoomalaru orwa okhuma oCanada. Miyo khuupuwela, "Miyo kiri va. Wulu! Atthu... Exeeni enikiira? Miyo nkiniira ele." Miyo khurowa orapiha ekaaro aka. Khuupuwela, "Muluku, koopacerya okhala mutthu oowuuluvala, ni kiri va. Koowana. Kihinla. Koovekela. Nto etthu enaakhel'aka oveeha wuulupale."

¹⁸³ Etthu p'itthu, mutthu onoohimya etthu yootakhala mwaha wa nyuwo, "Oh, santu-oophirikeya," etthu siiso.

¹⁸⁴ Miyo kaahuupuwela yeeyo. Nto Nsu nimoso khukirweela, khwira, "Atthu ale ari saana yairaka eyo, masi Miyo nkiwiihanenleni wira mwiire yeeyo. Miyo kiwiihanenleni omukuxa Xoowa ni weemela vale ntoko Yoxuwa ni otharimula, munna. Kahi weettasa ni nikhuru nimoso n'atthu na khalayi wala mutthenkeso mmosa wa ekereja, masi omutuphela xetwani. Okhala ohoolo, okhaliha yoolikana yoolikana, ni yoovonyeya ovonyeya. Mulaleye Masu nto musuwele t'ani orina waamini wira aamini Yaawo. Wooniherya voohoova."

¹⁸⁵ Miyo khupacerya orapiha ekaaro eyo kaakuvaka, okathi wothene, kirapihaka. Miyo kwira, "Kooxukhuru, Pwiya. Kooxukhuru, Pwiya." Kaahoona saana nto. "Vaareera, Pwiya, kinomphura-tho voolipaxa, ni kinthuna kikhwe ni Yoowo mmatatani."

...t'ani onwery'aka *omusuweliha mwixuttiho?*
(Nwiriyanene.)

...meesa t'osareya marapheyo...

...ale ahiihiwe waama, ni akumihiiwe vamapeleni.

Vano nwehe.

Maana nikano ntoko yeeyo vasulu—vasulu va nikano, nikano vasulu va nikano;...yooruma vasuu va yooruma; vakhani va, ni vakhani vale:

Maana ni moolumo ookukuma ni ilavulelo sikina Miyo kinimwaalavulela atthu ala.

Yaawo eyo ahimeeriw'aya wira, Ela ti esabbath yeeyo mukhanl'anyu waamumulihaka ale akhulumunwe; . . . ela ti evolelo: masi awo khiyaatthunne wiiwa.

Tivo masu a APWIYA yaahaaphiyerya awo (Ookhala aalalenrye Yaawo.) *nikano vasulu va nikano, . . . vasulu va nikano; yooruma vasulu va yooruma, . . . vasulu va yooruma; vakhani va, ni vakhani vale; wira erowe, emorele ottuli, yinteye, ni evarihwe vantaphani, etthukeliwe.*

¹⁸⁶ Exeeni Omumula? Okathi xeeni Omumula orwii'aya? Okathi atthu yaalavunly'aya ilavulelo sikina ni yaarin'aya iyano sookukuma. Iyano sookukuma; awo khiyaalavula etthu. Awo yaamukukuma. Eyo yaakhumelenle liini? Nihiku na Pentekosite, okathi Eroho Yowarya erwii'aya. Iwo t'ukhanle Omumula: Eroho Yowarya. Yesu oohimya, "Murwe wa Miyo, nyuwo othene mulemeliwe ni muhaaxiwe, nto Miyo kinimoovahani Omumula. Miyo kinimoovahani Ekumi, Ekumi Ehinimala," Zoe, Ekumi ya Muluku mwaneene. Muluku onimoorwa mwa nyuwo ni akhale mpantte wa nyuwo. Owo onimoorwahani oyariwa ni wookhalihani mwaana mulopwana ni mwaana muthiyana.

¹⁸⁷ Vano nwehe. Iwo waari omumula wa neeraru Owo aavahaly'awe. Woopacerya: Muluku aahaakhela, wa miteko Sawe. Wa nenli: Isarayeli aahaakhela, muhina mwa ikano. Wa neeraru: Ekereja ehaakhela, ntoko mpantte wa Muluku.

¹⁸⁸ Tthaaru ti nummaru n'ekumi. Akavi ansuwela yeeyo? Khula okathi munoon'anyu tthaaru, ekumii. Nwehe, okathi Muluku opattuxaly'awe elapo ya vathi, nihiku na neeraru yaari ekumi. Akavi ansuwela yeeyo? Nihiku na neeraru. Yaahirwa ekumi nihiku na neeraru na opattuxa.

Oraaru: Tithi aari vasulu v'atthu, mwa Nripu na Mooro; Mwaana aari Mutthu, Yoowo aalavunle n'atthu khwaakhaliha oolikana; Eroho Yowarya yaari ekwaha ya neeraru, yeeyo yaari Eroho Yowarya, Muluku mw'atthu. Ekumi! Tithi, Mwaana . . .

Omumula, wa Muluku; omumula, wa Isarayeli; ni Omumula, wa Ekereja, osuka esabbath.

¹⁸⁹ Tivo, vakhala wira khimunaakhele Eroho Yowarya, nlelo, khimunatoko ovolowa Momumulani mwa Muluku. Khamurina wira, "Oh, nkaakhanle. Kinthuna onvura sikaro. Miyo—miyo nkaakhanle wira; miyo ka muKristu. Vekeekhai nkinthuna owurya, masi ka muKristu. Nkinwerya tu, nkinthuna owurya, masi nlelo onnikisivela."

¹⁹⁰ Mwaakhalelaka—ru ithaama athiyana, mwairaka—ru itthu iya sootakhala, khamunavoloweke okathi uwo wa Omumula nlelo. Khamunavolowe Momumulani mwanyu.

191 Nto okathi onvolow'anyu Momumulani mu, munoomumula miteko sanyu sa molumwenkuni, ntoko Muluku saamumunly'awe Sawawe. Mwaha wa xeeni? Nyuwo mwa epantte ya Muluku. Munoomumula, Voohimala. Eyo vo. Eyo ti esabbath. "Murwe wa Miyo, nyuwo othene mulemeliwe."

Olelo, owo oothanla *nihiku nimosa*, . . . *nuvira okathi munci-ene*, mwa Davidi; . . . *nyuwo mwaiwa nsu nawe, muhuumihe mirima sanyu.*

192 Nuulumo nimosa paahi wala manli va vano, ninoomaliha.

Okhala wira ole ovolonwe momumulani mwa Kristu, . . .

Murwe wa miyo, nyuwo othene mulemeliwe ni . . . muhaaxiwe . . .

. . . *nyuwo moomumula miteko sanyu, ntoko Muluku aamumunly'awe ovara sawawe, nihiku na neethanu nenli.*

Sawinyu pooti saakhanle mwaakha wa namiloko miraru, wa namiloko mixexe, wa namiloko mithanu, onakhaleru exeeni. Moomumula miteko saavar'anyu, ntoko Muluku aamumunly'awe Sawawe, Voohimala. Khamunthhuna-tho itthu sa molumwenkuni. Olumwenku ohookhwa wa nyuwo.

193 Vano, versiikulu 11 vano, nwiriyane.

Tivo niilipiheke wira nivolowe momumulani mmo, (kahi *ola*, kahi *ola*, masi *Ola*), *wira ohikhale onrowa omora ntoko nthoonyeryo nle no ohaamini.*

194 Exeeni ila? Nripu na Mooro nri vaava. Nlaikha n'Apwiya nri ni hiyo. Nlo nniira itthu imosaru Owo aahimmy'awe wira aamwiira. Nto atthu animwiikwattula mwa yeeyo, wira, "Oh, ahe, kinoona wira Eyo ti yoolikana. Eyo ti yooreera saana. Oh, kinoona wira Eyo eri saana." Mwiikasoope wira muhimorele vantaphani nimosaru nenlo na ohaamini. Mukuxe Eyo ni murim'anyu wothene.

195 Nwehe.

Maana masu a Muluku (kahi mwiixuttiho wa ekereja), *masu a Muluku* makumi, *t'owerya*, . . . *t'owiithexa onvikana xoowa oniitha ninno-ninno*, (nwiriyane), *annivolowa mpakha . . . vankawanyeya munepa, erooho*, . . . *anikhomanyiwa makhuva, ni . . .* (nwiriyane), *ni annilamula sowuupuwela ni soothuna sa murima.*

Yaari exeeni iyo? Eroho Yowarya enniwerya orwa ni wira, "Nyuwo muhiira etthu *khata-khata*. Ni nyuwo muhiira *ela* ni muhiira *ele*. Mookhalana muthinto *ola* w'eretta, ni *ele*. Mwalokiherya-ru *ela* oratteene, munimwiira *eyo*." Munnona? Namalamula sowuupuwela.

196 Nto atthu aniira, “Exeeni iyo? Vano, eyo osoma miyuupuwelo. Vano, eyo e...Owo nahakoo.” Munnoona enihimy’aka? Owo olumwenku, wootakhala wa khalayi wooraruwasa ohimmusuwela Muluku.

197 “Awo makumi, oowerya, t’oweryexa onvikana xoowa oniitha ninno-ninno, ni annilamula sowuupuwela ni sootthuna sa murima.”

Vano, exeeni iyo ensuwela sootthuna sa murima? Muluku. Nyuwo muniira, “Ahe, Bibilia ohimnye wira, ‘Masu a Muluku.’” Masu a Muluku ti Muluku.

*Wopaceryani naari Nsu, . . . Nsu naari ni Muluku, nave
Nsu naari Muluku.*

Vano Nsu naahiipaka erutthu, khukhala ni hiyo, . . .

198 Muluku onnilamula sowuupuwela. Abrahamu aahirukunuwa ettuli awe, ni—ni Muluku aahirukunuwela ettuli Awe eheema. Vano Saara khutheya. Vano Muluku aahirukunuwa, khwira, “Exeeni emutheihale Saara?” Namalamula a sowuupuwela sa murima! Kintthuna wira eyo ekele muhina vakhani.

199 Vano okathi enivenyaaya enamuna eyo ya muteko, Muluku aalaihery’awe nihiku nookiserya, exeeni ekhumelenle? “Osoma miyuupuwelo.”

200 Awo khiyaamwiihanne Pwiya, Mwaneene, “Pelizepuli”? Owo khwira, “Vakhala wira awo yaahimwiihana Mwaneene etthoko ‘Pelizepuli,’ khantempe owiihana arumeyi Awe?”

201 Miyo kinnoophentani. Eyo enoorowa wooniherya wira munnicaliwa voophiyerya, khamurina orwa empa yookhalana ettheku yooriirya vooreera wira mwiiwe Ehapari yooreera. Moovoliwa etala voophiyerya orwa nipuro ntoko nla. Muluku khonitthunihenrye oteka etthu yooikhala yeela. Hiyo enninisivela ela siisa. Muxaaxa mwaamukhaani paahi, masi t’inamuna eniphent’ahu. Muluku khonikhala mookaryani. Muluku onkhala mwa wiisumaaliha. Hiyo ennisivela ela siisa. Nootteeliwa murima orwa, ni nyuwo mootteeliwa, nave, okilaathi ni—nipuro ntoko nla. Hata wira oniviha sayi, hata muniviheriwa sayi, ekuwo anyu esya, eyo khenivirikana hata vakhani.

Munwiriyana Ekumi Ehinimala, Masu a Muluku answela sowuupuwela sa murim’anyu. Nripu na Mooro naithomeiye vasulu v’ana a Isarayeli, niithomeiye vaava ohiy’ula. Kaamuwerya otharimula: khaavo hata mutthu aarowa owerya weemela va vathi va owerya wa Eroho Yowarya Muluku ahaarow’awe omuhimya ni omuleela etthu owo okhanly’awe. Eyo ekeekhahi. Eyo vo.

202 Exeeni Iyo? Exeeni Iyo? Eroho yeeyo emosaru yaaweetihenrye aana a Isarayeli momumulani mwaya, vano

awo khumora mwaha wo ohaamini. Nyuwo muhimore. Ola okathi wookiserya. Tithi, Mwaana, ni Eroho Yowarya, Ekumi enrwa eviraka mwa yeeyo.

²⁰³ Okhalihwiwa naxariya, Martinho Lutero, nlelo enamuna emosa y’etiini. Oreerihwiwa . . . Martinho Lutero; John Wesley; opatiiso wa Eroho Yowarya, Ekumi. Okhalihwiwa naxariya, onkhala waamini; oreerihwiwa, okukutthiwa; Eroho Yowarya, osarihiwa, Ekumi. Kahi mwa okathi wa Lutero; awo yaahikhalana Eyo mwa enamuna emosa. Kahi mwa okathi wa Wesley; awo yaahikhalana eyo mwa enamuna emosa. Masi ola okathi Eroho Yowarya enrwa’aya, Mmansaya.

²⁰⁴ Nto nyuwo mwaira muhaakhenle Eyo, muniira sayi, munwerya sayi waamini miiriya? Ontthuneya Muluku, mwa nyuwo, wira mwaamini. Nyuwo muniira ntoko Muluku. Munsuwela ntoko Muluku. Munuupuwela ntoko Muluku. Bibilia onihimya wira nyuwo mwa ole oosuwela vakhani, “amuluku” axikhaani. Yesu ohimye siiso. Maana, nyuwo mwa mpante wa Muluku.

Siiso ntoko miyo kiry’aka Branham mukhaani, ni nyuwo mwa mukhaani wa ole mukhanly’anyu, ni okhala wira axitiith’inyu ti nsina nenlo. Mukhalelo mury’anyu mwaha wo wira axitiith’inyu ari siiso, okhala wira muyariwe ni yaawo.

Nto mwaha wa yeeyo munimwaamin’anyu Muluku, ni waamini miiriya, ni ithoonyeryo ni sootikiniha, okhala wira nyuwo mw’ana alopwana ni aana athiyana a Muluku. Muhaakhela Ekumi. Ekumi enrwa mwa ya neeraru. Vaareera.

²⁰⁵ Okathi Yesu aawenly’awe vamwaako, mapuro othene Owo aarow’awe, aamukuxaka Petru, Yakopo, ni Yohani, anamoona araru. Tthaaru nummaru n’Ekumi. Munniiwa saana? Ophenta, ohakalala, murettele.

²⁰⁶ Vano, nrowe naakuvaka vano wookiseryani w’ekapiitulu, naakuvaka, okathi onsom’ahu.

Tthiri masu a Muluku makumi, t’oweryaxa . . . onvikana xoowa oniitha ninno-ninno, . . . ni anlamula hata soothuna sa murima.

Khiivo etthu epattuxiwe ehinooniheriwa vamaithoni vawe: masi itthu sothene . . . ti soowooneya vamaithoni vawe ole onrow’ahu omuhimeerya miteko sahu.

²⁰⁷ Munna, khiivo hata ephepele yaarowa owerya okotela vanripuni vale, Owo ohisuwenle. “Itthu sothene ti soowooneya.” Munna, Owo onnisuwela khula etthu mutonko anyu wira, khula muupuwelo otonko anyu wuupuwela. Ti yeeyo owo okhanly’awe. Hiyo nnimwaamini Owo siiso.

Nto okathi Muluku onrw’awe mwa hiyo, n’unikhaliha muKereja, Owo onnihela soovaha n’itthu muKereja, wira sivareke Okhala Wawe. Vakhala wira Muluku ti Muluku

ohinimala, vano Owo onnaavoniha aretta. Owo onniwerya waahihimuxa alipa-ookhwa. Owo onniwerya waavoniha anamakuttula, waakhaliha oowoona alipa-oohoona. Owo onniwerya ovaha soowoona. Owo onniwerya wira inamuna sothene sa ithu iya, avaraka muhina mwa Ekereja Awe, okhala wira Owo ti Muluku mwa nyuwo. Eyo vo Ekereja.

²⁰⁸ Ekereja enkhala sayi Ekereja, mwaha wo wiitakaniha Memmo? Nnari, mulopwana. Mwaha wo ovahana matata? Nnari, mulopwana. Mwaha wo opatiiso wa maasi? Nnari, mulopwana. Mwaha wo okhala mempuru? Nnari, mulopwana. Mumphwanya sayi Yeeyo? “Maana ni Eroho emosa hiyo othene noopatisiwa mw’Erutthu emosa.” Eyo vo.

²⁰⁹ aRooma 8:1.

Vano khiivo ehukhumu. . .

“Hata ehukhumu ya molumwenkuni.” Awo khanwerya woolokohani mwaha w’etthu.

Khiivo. . . ehukhumu enaaphwanya ale ari mwa Kristu Yesu, ahineettela ithu s’erutthu, masi sa Eroho.

²¹⁰ Eyo vo. Ti siiso moota w’olamula oKristu anyu. Ti siiso moota wo osuwela wira moovolowa Momumulani mmo, olumwenku khonoohaaxani-tho. Vekeekhai. Moonaka vale, munookhuma-vo. Mookhalana etthu yooreerela wuupuwela. Eyo vo, “Hata ehukhumu.” Ti siiso hiyo onkel’ahu mw’Erutthuni.

²¹¹ Nto nyuwo munkhala oolipa, “Mahiku othene.” Bibilia ohimnye siiso. Nkawehani va mwa aHeperi, kapiitulu 10. Owo ohimnye wira:

Tthiri vaavo vari soovaha sa inyompe ni mukuttho, sinniwuupuxerya sinnipakiwa mwaha wa itampi khula eyaakha.

Masi mutth’ula, . . . oohela mukuttho mmosa. . .

Nttottopeliwe Nsina Nawe noowaarya!

Siiso mwaha wa mukuttho mmosa owo ohaareerihha voomalela wa mahiku othene. . .

²¹² Aleluya! Kahi wa muhakalaliho ontharelana, masi wa mahiku othene. “Ithhu sa khalayi soovira; nto ithhu sothene sookhala isya.” Hiyo nineetta moWaaryani, Waarya wooreera. Axipalame aniipa voovirikana.

²¹³ Kiri va, kinwehaka namuhapaliw’ola mwaamukhaani, wa miyaakha soophiyaka mithanu sivinre, woona waka. Rosella, oweha woorimeela, eettaka iphiro s’oChicago, oohapaliwa, aittikinyaka, eettaka mwa khula enamuna y’etampi yaakhanle, ohapaliwe-ene ni sothene aakhanly’awe okhalaka. Nto ohiyu omosa, Eroho Yowarya, ekhanle ekumi ni yooweryaxa onvikana xoowa oniitha ninno-ninno, khwira, “Muthiyana, nyuwo mwa namuhapaliwa.” Aleluya! Owo aahikhale Muluku mmosaru

yoole aari ottuli wu, aasuwenle wira Sara aahitheya ottuli Wawe, nkisuwenle etthu Owo okhanly'awe.

214 Vamuthukumanoni wa osulu wa mwamuthiyana mukina. Owo aahirowa khimukuxa, khimuruuha vale. Khwira, "Nyuwo mwa oopahuwa mwaha wa sohapala." Moota Owo onlamul'awe soutuupuwela sa mmuruni!

215 Nto arumeyi aalupale oottittimiheya yaakilanthe vale, yaawo arina elaleeryo ya molumwenkuni mothene, yikimanyinhe-ene matata, ewanre-ene ikamiseeti, yuupuwela wira hiyo khinaasuwela awo, yaawerya okilaathi vamuthukumanoni siiso ni Muluku khaarowa wuupulula wira awo yaari aani. Ekilanthe-ene vale, yooneyaka voovirikana, ntoko wira yaari mutthu mukina. Eroho Yowarya yaanisuwela wira yaari aani. Nto awo yaakilanthe vale, mmurimani mwaya, yuupuwela wira Iwo waari osoma miyuupuwelo. Khansuwelaxa sa Muluku onvikana Otentoote saarow'awe osuwela sa ohiyu wa w'Ejitu. Ti yeeyo. Awo anuwela Eyo mwa olempwa, masi kahi mwa Eroho. "Yoolempwa enniiva, masi erooho ennivaha Ekumi." Ti yeeyo. Owo ti muupuwelo. "Makumi, ooweryaxa onvikana soowa oniitha ninno-ninno, Onlamula soutuupuwela sa murima."

216 Nwiryane. Nwehe.

Khiivo etthu epattuxiwe ehinoonihiriwa vamaithoni vawe: masi itthu sothene ti sookhunliwa ni soowooneya ohoolo vamaithoni vawe ole . . . onrow'ahu omuhimeerya miteko sahu.

Tivo okhala wira nookhalana namukuttho muulupale . . . (nwiryane vano; w'aretta.) . . . yoowo ovolonwe wirimu, Yesu Mwaana a Muluku, nrowe nilipiherye waamini onlaley'ahu.

217 "Olipiherya," eyo khenihimya wira okhalela onamoona voohiheryerya. Mwaahikhaleke makhalelo ene, khamunlipiherya; muntthara makhalelo a etthu y'enamirima miili. Nyuwo mwa . . . Vanreerela mukhale ota nto mwiire mwa natampi paahi ni muliyale etthu iyo. Muhihimye okhala muKristu, munakhala etthu ekina; nyuwo mwa nluku nookwattula nuulupalexaxa olumwenku otonko aya okhalana. Mwaari natampi, mukupali ni, mukelele ohoolo, mwiilakiherye ni Muluku. Mwaari muKristu, mulipiherye waamini wanyu, mukhale vaavo.

218 Nwehe ela vano. Kintthuna kikelihe ela muhina nihinatthi orowa.

Siiso hiyo khanikhalanne namukuttho muulupale ohinwerya onimorela ikharari mwaha wo owereya wa iretta sahu; masi oheeheriwa mwa sothene ntoko . . . hiyo, nave khuhikkhalana etampi.

Nwiriyaane.

Naattameleke n'uroromela ehice ya mahala, wira niphwanye omoreliwa ikharari, ni wira niphwanye mahala ni okhaliheriwa okathi woophwanelela.

Nittottopeliwe Nsina na Muluku!

219 Nwiriyaane, aPatista, aPrespiteriyano, aLuteraano. Munoorowa okikoha yookoha ela, "Abrahamu aahimwaamini Muluku, vano aahikhalahiwa naxariya." Koosuwela. Ti vaavo kweekwe munrowak'anyu. Eyo ekeekhaii. "Exeeni-tho mutthu okhanly'awe wiiraka woohikhala omwaamini Muluku?" Eyo ekeekhai volikana. Eyo ti yothene okhanly'awe wiiraka. Masi Muluku akupaliru waamini iwo, Owo onoovahani Eroho Yowarya.

220 "Vano kiireke exeeni, Munna Branham? Kikhuweleke?" Khivantthuneya. "Kilavuleke ilavulelo?" Khivantthuneya. Nyuwo pooti okhuwela ni olavula ilavulelo, sothene, nave nlelo munakhala ntoko pa-pakawu, ni nlelo khunaakhalela ithaama athiyana. Nyuwo pooti onvura sikaro nlelo ni owurya, n'itthu sothene sikina. Miyo koowoona atthu olavula ilavulelo, n'ukhuma ni omwiira nakoso oonanarexa, ookhoropana kitonko aka omoona. Miyo koowoona okhuwela, ni wunla maithori a ekonya, ni wiiya etthu p'itthu yaaphwanyaaya. Koowoona awo okhuma, ni khula mwali aarowa mphironi, omurukunuwela. Uh-huh. Eyo ethonyeryo emosa yooreerela wira khamurina Eyo. Eyo ekeekhaii.

221 Masi, munna, okathi onvir'anyu mookhwaani khuphwanya Ekumi, itthu iyo sothene sinkhala sookhwa, nto nyuwo munkhala yoopattuxiwa esya mwa Kristu Yesu. Moona etthu yoovonyeya, munoovekela mwaha wa yeeyo, "Muluku mmoriwe ikharari." Ni moona milattu, ohiya orowa n'uthariha, ni ophavela otepiha, munoophavela omuruwela mutth'uwo ni olakiherya, ni omaliha naanaanoru. Eyo Eroho ya Muluku mwa nyuwo.

222 Mwavonya vale? Nyuwo munoovonya. Mwavonya vale, munoolakiherya naanaanoru. "Muhiiye nsuwa nitupweelaka mury'ene ooviruwa." Ti siiso munsuwel'anyu wira moovira mookhwaani khuphwanya Ekumi, mookhalana ophenta, murettele, ohakalala, wiisumaaliha, oreera murima, othunku, ovilela. Nookhalana Namukuttho Muulupale okilantho Wirimu, oolikana wira alapeleke mwaha w'ehimeryo ahu. Exeeni iyo? Okathi Yesu otthikenly'awe eLogos, Nripu na Mooro naahooolela aana a Isarayeli, okilantho-ene Ohoolo wa iye suulupale, ephattuwelo, ekhweyi ya Mithuko sinikhuma, Iroho thanu na piili sooloka voomalela, Eroho yooloka voomalela ya mphento.

223 Vano nwehe. Yoopacerya mphento *wooloka* voomalela, owo mphento wa Muluku, wooloka ni woohihononiwa. Wootharelana, onkela vo, ti ophenta *fileo*, iwo ophenta

murin'anyu w'amwaar'inyu ni an'inyu. Wootharelana, ommora numala owo, ti ophenta *w'ethaama*. Wootharelana ophenta *wootakhala*. Nto onootthikela omoraka mpakha okhala *woonanara*, onoorowa paahi ohononeyaka, ohononeyaka.

224 Nto itthu sothene saarina epacerelo, sookhalana emalelo. Ni sothene iyo sinoorowa okumihiwa naanaanoru, ni ohikhala wuupuweliwa wa seiyo, nnakhala, nto onootthikela-tho ole wooloka voomalela, nihiku nlo. Nto enamuna emosa paahi...Nyuwo khamukhanle weemela vathi va, eriyari y'ephiro, nto khuphiya *va*. Muhaana okhala muhina voomalela, muroromelaka, mmumulaka voomalela mwa woopowa Yesu Kristu oovahaly'aweni, mwaha wo waamini.

225 Yookhala Eroho ya nneema enkhuma wa Muluku. Eyo t'iphattuwelo, ephattuwelo ya Muluku. Nlo nneema. Yootharelana ti mutthu onrowa onvarela "muteko wooreera" namwaattamanani awe. Yootharelana ti mutthu, "murin'anyu omuweha saana." Yootharelana ti mutthu, "okhanle nawiiye." Yootharelana ti mutthu, "okhanle namwiiva," onnituphela. Munnoonna moota enihoney'aya, okathi enikhuruw'aya? Masi itthu sothene iyo sinihimya ele y'ekeekhai.

226 Ti yeeyo miyo enihimya'aka. Khula okathi munimoon'anyu mutthu oni...Muniwoon'anyu anaithoko anli yeettaka mphironi, oophentana, khino arinasa miyaakha miloko mithanu na miraru. Eyo enihimya paahi wira Wirimu aakhala anaithoko eemiravo anaathonyerya awo, Wirimu. "Emp'ela ya vathi va yakurumuwa vale, nookhalana emosa Iwe."

227 Mwaamoonaka mutthu awokaka, aiyaka, oothaka, muupuwele paahi, mpantte awe onnimulipelela omooroni, yoowo, nipuro nawe owo onrow'awe ohooxiwa Ohoolo wa Muluku ni Malaikha oowaarya, ni mooro ni esoofiri. Owo onoorowa ohooxiwa weiwo. Kahi mahiku othene, khokhanle ohooxiwaka mahiku othene, mahiku othene khenihimya wothene, okathi wothene. Ehimalelo ti mahiku othene, Ehimalelo ti...kherina epacerelo wala emalelo. Masi *mahiku othene* ti "evirelo y'okathi." Bibilia ohimnye wira, "Mahiku othene ni," etakaniheryo, "mahiku othene." Yona ohimnye wira aari mmirimani mwa nankumi "mahiku othene." Eyo evirelo y'okathi.

228 Masi, nwehe, eri Ekumi emosa paahi Ehinimala, nto owo ti Muluku. Ni vakhala wira munrowa ohooxiwa mahiku othene, ni khuhinakhwa, mookhalana Ekumi Ehinimala. Khamukhanle ohooxiwaka mahiku othene...Pooti ohooxiwa mwa miyaakha imilyawu emiya, Ohoolo wa Muluku ni Malaikha oowaarya, ni mooro ni esoofiri. Nkisuwenle okathi xeeni eheleliw'aya. Masi vookiserya ehaana ophiya w'emaleloni okhala wira yaahikhalana epacerelo. Nto Muluku meekh'awe t'orina Ekumi Ehinimala. "Ole oniiwa Masu Aka, ni onimwaamini Ole

okirumme,” khorina ekumi ya *mahiku othene*, “owo orina Ekumi Ehinimala.” Ekumi iyo enipacerya, kahi hat’etthu ya *nno*. Masi ya osulu Iwe, Ekumi Ehinimala, *Zoe*, Ekumi ya Muluku Mwaneene enookhuruwa n’ukhala mwa mutthu, nto owo onkhala Oohimala ni Muluku, ni khokhanle okhwaaka. Ti yeeyo Masu ahimaly’aya.

229 Muupuwele paahi. Sookhala Ikumi Soohimala piili? Khimwaarowa oweriya waakhula eyo, mwaamuweriya? Eri Ekumi emosa paahi Ehinimala, nto eyo Ekumi ya Muluku. Muthint’ola mukina w’ekumi, hata wira exeeni, wookhalana emalelo aya. Ni etthu p’itthu yaarina epacerelo yookhalana emalelo. Masi etthu p’itthu yahaarina epacerelo kherina emalelo. Ni Muluku ohimnye wira Owo aamuruwa onivaha Ekumi Ehinimala, ehirina epacerelo, hiyo nipakiwe paahi epante ya Yoowo. Ni vekeekhai Ekumi eri mwa hiyo, kheruuihiwe mu ni ephattu ya mutthu. Ephattu ennivaha erooho, masi erooho eyo ehookhwa, nto nirina Eroho ya Muluku. Avuwihwiwe Muluku!

230 Muluku aari mutthu? Vekeekhai. “Nrowe nimpake mutthu onlattana ni Hiyo.” Muluku aari exeeni? Teyofaniya, erutthu. Nto vale mutthu aapakiwe siiso kuheliwa omatta. Masi khaakhanle mutthu wira alimeke etthaya, mwa itthu s’erutthu. Vano Owo khumpattuxa mutthu vatthayani y’elapo ya vathi, mwa ekumi ya enama, nto mutth’uwo aanilima etthaya. Vano mutth’uwo aahimora, mwaha w’ottheka. Voolikana. Nto Muluku, Teyofaniya, aahikhuruwa khwiipaka erutthu khukhala ni hiyo, wira amoopole mutthu.

231 Tivo kehiyo hat’etthu mwaakhanly’anu wiiraka. Nyuwo mwa natampi, opacerya wene. Mpakiwe mwa sootakhala. Muyariwe mutampini, murwiiye mulaponi moothaka. Muyariwe mu molumwenkuni mu mwaha wa otthuna w’ekhapa w’atith’anyu n’ame anyu. Ni mwa oolamuleliwa omooroni ntoko sinweryaney’aya okhala, nkincala etthu xeeni muniir’anyu. Nyuwo pooti muhinatoko wootha, wiiya; otthara khula yooruma, ni sothene sikina; nto munoorowa omooroni, ntoko makhare arowaka mpuruni mwawe. Masi enamuna emosa paahi mukhanly’anyu okhalaka-tho mukumi, onkhala okupali Eroho Yowarya, Ekumi Ehinimala ya Muluku.

232 Exeeni yookhalinheni ele mukhanly’anyu? Wopaceryani, okathi Eroho Yowarya yaaphuramwenly’aya elapo ya vathi, khiyaakhanle hat’etthu woohikhala okhuma wa maluku a mooro. Nluwa naamukhaani na Paasikha khukhuma. Muluku khwira, “Nle ninkhala ntoko nooreera. Mukhale mphuramwelaka paahi.” Maluwa yaahikhuma. Malaxi yaahikhuma. Miri saahikhuma. Axipalame khuvava ekhumaka vatthayani. Axinama yaahikhuma. Mutthu aahikhuma.

233 Vano, yiiriwe sayi? Mwa ophuramwela wa Eroho Yowarya, eruuhaka itthu iya vamosa, potaasiyu, ekalsiyu; epakaka maluwa, empakaka mwaamunama, yoopakakani nyuwo.

234 Nto vano, murina othanla wootaphuwa. Muluku onimoophuramwelani-tho, ni wira, “Mwiiwe Nsu Naka? Muhuumihe murim’anyu, ntoko mahiku a woopaciwani.” Va Owo onookhuruwa, onlaleya Masu.

“Ehapari yooreera yaalaleeriw’aya khiyaari . . . khiyaaminni Yeeyo, tivo khiyaattottenle etthu.” Awo yaahiiwa Eyo, masi khiyaaminni Yeeyo.

235 Muluku aahikhuruwa. Owo aahiwooniha Nripu na Mooro. Aahooniherya ni profeta Awe, ithoonyeryo ni sootikiniha, Owo aari ni yoowo. Awo khiyaaminni Iyo. Oh, waanaasivela woona miiriirya. Waanaasivela omwiiwa profeta. Masi vari waamini Yeeyo, awo khiyaaminni. Makhalelo aya annooniherya wira khiyaamini.

236 “Vano,” Owo iirale, “muhitthare nthoonyeryo nenlo na ohaamini.” Okhala wira mahiku ala ookiserya, wa ekereja y’Amalapo, Muluku ookhumelela-tho; ethoonyeryo emosaru, mutikiniho mmosaru, Nripu na Mooro nimosaru, noolipiheriwa, nowooniheriwa. Nihuumihe mirima sahu n’umora mootehattehiwani memme wa khalayi, wo ohaamini, maana nnimuntta mulaponi nto eyo enrowa okhala yothene.

237 Nto okathi Eroho Yowarya emman’aya murim’anyu, [Munna Branham ommana vapulpitu—Mol.] “Nuvira okathi munci-ene, mwaiwa Nsu Naka, muhuumihe murim’anyu.” Oniira, “Mwan’Aka, ela Ekeekhaii.” Muhinweheke namitthaka. Mwiiwelele Mutthaka. Mwaamini Yoowo. “Muhuumihe murim’anyu, ntoko mahiku aapaciw’awe.”

238 Owo aiwa Nsu Nanyu, “Muhuumihe murim’anyu.” Vano nyuwo muniira, “Ayo, Pwiya, miyo kinnaamini.” Vano munookela mw’Ekumini, Eroho Yowarya enookela mwa nyuwo. Eroho anyu ya khalayi enimookhwa, enookhalihani nathaama ni onyokha, ni etakhalelo ni owanani, ni—ni onyokhana ni itthu iyo sothene, sinimookhwa. Nto nyuwo munkhala oosareya mphento, ohakalala, murettele, mmumulaka. Hata wira ittheeku sinruma sayi, sothene siri saana.

Nankur’aka onlipa muhina mw’ekuwo.

Mwa khula mwanankhaya oowali,

Nankur’aka onlipa muhina mw’ekuwo.

Maana mwa Kristu, Mwala woolipa kinnilipa;

Itthaya sothene sikina mihaava sinkomowa.

239 Eyo vo. Eddie Perronet, ole olempe nsipo nle noosuweliwa. Itthaya sothene, miromolelo sothene, iyaaminelo sothene, miixuttiho sothene, sinnimalamala. Kristu!

Nyuwo muniira, “Ahe, miyo kinnimusuwela Bibilia.” Khamunkhalana Ekumi mwaha wo omusuwela Bibilia.

“Miyo kinnimusuwela katikeesi aka.” Khamunkhalana Ekumi mwaha wo omusuwela katikeesi anyu.

“Ahe, miyo ka muKristu.” Khamunkhalana Ekumi mwaha w’ohimya okhala muKristu.

²⁴⁰ Munkhalana Ekumi mwaha w’omusuwela Yoowo. Omusuwela Yoowo, mookhalana Ekumi. “Vano munoovolowa Momumulani mw’Awe. Munoomumula miteko sanyu, ntoko Muluku aamumunly’awe ni Sawawe.” Munkhalahiwa mwaana a Muluku, oniira mpanthe wa Muluku. Ni vakhala wira eyo—vakhala wira Eroho Yowarya eyo enniweepesani, ni nyuwo munaakhula weepesa iwo ni wira, “Ayo, Pwiya,” wala woomaalihani.

²⁴¹ Woomaalihani, “Murwe wa Miyo, nyuwo othene mulemeliwe ni muhaaxiwe. Kinimoovahani Omumula.”

²⁴² Nto nyuwo muniira, “Ah, miyo ka mmiravo. Kihaana... Oh, pastore aka khoni... Yothene erin’aka wira...” Munnona? Khamunkhalakhala mphwanyaka Eyo.

²⁴³ Masi mwaira, “Ayo, Pwiya’aka. Kinniiwa Nsu Nanyu. Nkinuumiha murim’aka. Nkincala, Pwiya, Awo Masu anyu ni kinniwaaminini Nyuwo. Kikuxeni, Yesu, ‘Siisa ntoko siry’aka, woohikhala y’ohimya, masi wira Ephome Anyu kimwaraxeliwe miyo. Nto vo kinoochimya wira, “Kinimwaamini.” O Mwaapwittipwitthi a Muluku, kinnoorwa.” Muhele matat’anyu vamuru Wawe wooluwela, mwiire, “Pwiya, miyo ka natampi, ni Nyuwo mookiihana.”

²⁴⁴ “Othene ole Atithi akivahaly’aya onimoorwa wa Miyo, ni Miyo kinoomuhimuxa mahiku ookiserya.”

²⁴⁵ “Ayo, Pwiya, kinnoorwa. Nkinuumiha murim’aka, ntoko awo siiraly’aya wopaciwani, vekeekhai kinnaamini.”

²⁴⁶ Vano exeeni Owo oniir’awe? Owo onoovahani Ekumi Awe, Zoe, Ekumi Ehinimala. Nto vakhala wira Muluku aahiweriya onivenxa vatthayani v’elapo, vaavo onikhum’ahuvo... Hiyo nikhumme vatthayani? Ithhu sothene munoon’anyu, sikhumme vatthayani. Nto vakhala wira Muluku aahiweriya okipaka ele ery’aka olelo, kihikhalanne hata ethanlelo; mwaha paahi wo wira otthuna Wawe waari okipaka, ni okivaha oreeriwa w’oweha oKalvario ni wira ethanlelo aka; ni miyo khwira ethanlelo aka khumwaamini Yoowo; khivatempe Owo orowa okihihimuxa! Vakhala wira Owo ookipaka ele ery’aka, kihithanlale, vano khuthanla ni khimukupali Yoowo; okathi Owo aipwehenry’awe matat’Awe Mmansawe, khwiilaphela Mwaneene, wira aamurowa okihihimuxa nihiku nookiserya. Kinookhala oolipa.

247 Kookhalana Omumula, kahi mwaha wo wira kinnikokhorela Ttiminku, kahi mwaha wo wira kinnikokhorela saapatu. Eyo kherina naata n'iyoy. Kinkokhorela okhala wira koovolowa mmuretteleni mw'Awe ni Omumula: murettele, omumula, ophenta, ohakalala. Itarupa sirumeke; nankur'aka t'olipa.

248 Mookhalana musuwelelo yoowo, ohiy'ula, mpatthani aka mukilante va mutapernakulu mu mooviha? Khimurwenle okiwa miyo. Nnari. Murwenle wiiwa Masu. Nwiryane, mpatthani aka.

249 Vano mwaahikhalane Omumula iwo, munoowerya ophwanya Yoowo naanaano va. Khamurina orwa waltaari nno. Mukilaathi vaavo mury'anyu. Mukhale naxariya, nto mwiire, "Kristu, mulavule paahi ni murim'aka. Koosuwela wira vaaviha. Kiri-kiri othene oonaana, ooviheriwa. Kiniisoona otepa. Masi, Pwiya, vekeekhai, pooti okhala kiviheriwaka ni owereya, wootepa ovikana ola, vahinatthi oxa."

Ni meetiku pooti ottikinya muru awe, wira, "Owereya wa murima. Ohookhwa." Nto xeeni?

250 Exeeni nto? Okathi Eliivuru yuulupale enikhunliw'aya exeeni nto? Muhiiwa nsipo nlo, *Exeeni Nto?* "Okathi ale akhoottale Mutthaka, anrow'aya okohiwa ekiiswa, exeeni nto?" Exeeni nto? Nkuupuwelani yeeyo vano, voowiixerya saana.

251 Nuuramaka muru ahu, muupuwele yeeyo.

Okathi ole onikhootta Mutthak'ola ohiy'ula,
Onrow'awe okohiwa wira ahimye ekiiswa aya,
exeeni nto?

Exeeni nto? Exeeni nto?
Okathi Eliivuru yuulupale enikhunliw'aya,
exeeni nto?
Okathi ale anikhootta Mutthak'ola ohiy'ula,
Munrowa okohiwa wira muhimye ekiiswa aya,
exeeni nto?

252 Tithi a Wirimu, yothene ela eri mmatatani mw'Anyu vano. Va eri eSabbath y'ekeekhai emphwanyaneya ohoolo w'atthu. Va nri Nlaikha na Muluku, mwa miyaakha sookiserya, noolavula mulaponi mothene. Alipa-oowuulumela ni itthu sothene, aneerery'aya olamula Yoola. Masi, khula okathi, Nyuwo munnooniherya Mmansinyu wira mwa Mulukuu.

253 Olumwenku wa siyensiya, olumwenku wa ekereja; awo t'ohoona, Pwiya? Khino ookhala mmosa mu ohiy'ula onthuna waakhela woona wawe, wira akeleleke ohoolo, ni ohimuttehatteha Muluku, ntoko mahiku a woopaciwani; oheererya omuttehatteha Owo, mwa okhala ooloka Ttiminku, wala osuka nihiku khata, wala eyaaminelo khata, wala wira mpantta wa ekereja khata. Masi aarowa otthuna okhuma ni olyihiwa masoma, vamura mani, ni waakhela Eroho Yowarya. Ni

awo annitthuna Eyo. Ni waamini vano, awo amphavela okupali Yeeyo mmurimani mwaya. Awo amphavela ophwanya mahala ni Nyuwo, Pwiya.

254 Oh, khino awo aalavula ilavulelo. Khino awo pooti ekhuwenle-ene. Awo nlelo aakhalana eviruwelo ya khalayi. Awo nlelo aakhalana olavi-lavi yoole wa khalayi. Awo nlelo annaapa ni annilavula, ni anniira itthu sahaatthuneya wira yiire. Awo khantthuna eyo, Pwiya. Exeeni nto, okathi Eliivuru ile yuulupale enikhunliw'aya, yiirale, "Awo khanrowa ovolowa Momweneni"? "Mukhale ooreera murima voomalela, ntoko Atith'inyu Wirimu siry'aya oorera murima voomalela." Etthu p'itthu enihalela khenrowa ovolowa. Awo annimuroromela voomalela, ohiy'ula, ole okhomeliwe? Vaahikhale, Pwiya, awo yiire "ayo" ele Yoohimala naanaano va.

255 Mwiire, "Pwiya, miyo. . . Kahi wuukhuwa, masi kinnoona Etthu muhina mmurimani mwaka, Etthu iyo enikileela wira, 'Miyο kinniwerya naanaano va, ni mahala anyu.' Nto vano kinnookupalini Nyuwo okhala Moopoli aka. Ki—kinnikhootta itthu sothene sa molumwenkuni, nto kintthuna kivolowe Momumulani mw'Anyu. Ni kookupali wira kinimwiira naanaano va. Kookupali wira Eroho Yowarya enikiroiha nipuro nenlo."

256 Khula muru wuuramme-ene. Ookhala oniisoona siiso naanaano va? Nvenxe ntata, "Eroho Yowarya vano enikiruuha nipuro ohinrow'aka-tho okwakwaruwa mwaano." Muluku ooreeriheni. "Nkinrowa wira itthu iyo. Oviruwa waka woomala. Kinoowerya okhala ni murettele ni ohakalala ni ovilela, okhuma naanaano va. Kookupali wira Muluku onlavula ni miyo naanaano va, wira kinoowerya wira okhuma okathi yoola mpakha ohoolo, ni mahala Awe." Munnitthuna ovenxa matata? Muluku ooreeriheni. Muluku ooreeriheni mwamuthiyana. Mutthu mukina? "Vano kinnaamini."

257 Muhimuttehattehe Owo, ntoko nihiku noopaciwa. Muhuupuweleke wira okhala wira ninnirowa okereja Ttiminku, wala osuka esabbath. Paulo oohimya, "Nyuwo munsuka mahiku wala miyeeri sooneyakaru, wala sikina, kinniwoonelani othunku. Ikano siri ntoko eruku sa itthu sooreera sinthuna orwa, nave kahi etthu ene y'ekeekhai, khasinwerya omureeriha voomalela mulipa-ookokhorela." Masi Kristu onnooreerihani voomalela, oreerihiwa voomalela vamaithoni va Muluku. Owo onookumiha etampi anyu, onookumiha ehukumu mwa nyuwo, onoovahani ophenta Wawe ni ohakalala.

258 Munnitthuna ovolowa Momumulani naanaano va? Mutthu mukina onivenxa ntata, wira, "Miyο kiihira eyo." Muluku ooreeriheni, mwamuthiyana, nno moonο aka woothiyana. Muluku amureerihe mulopwana okilante moonο aka

woolopwana. Ovolowa Momumulani mw'Awe, muupuwele yeeyo vano.

²⁵⁹ Nvekele, "Ntoko siry'aka, Pwiya, woohikhala y'ohimya; nkihiyo ooloka. Khiivo ekhanly'aka woovahani Nyuwo, woohikhala makhalelo aka, oomalamala a khalayi, a mutampini. Munookaakhela? Munookikukuttha? Munookimumuliha? Okhala wira, koohimya wira kinimwaamini. O Mwaapwittipwitthi a Muluku, kinnoorwa. Vano kinnoorwa, kaaminiki vano wira koovira mookhwaani khuphwanya Ekumi. Okhala wira, vaava va vakhukuluni vaka, kihookupalini Nyuwo okhala Moopoli aka ni kinnoona murettele mmurimani mwaka."

²⁶⁰ Athanu aavenxa matata. Aamukhala mukina, onoona siiso, ovenxa ntata? Mwahaari muKristu, mmukupali Owo vano.

²⁶¹ Mwaahimiyaka okhala muKristu khuhinakhala a muxovo yoowo, nlelo mwa natampi, hata wira makhalelo xeeni mu—munikhalan'anyu, wala moota xeeni muneerery'anyu wiikhaliha. Eniir'anyu khenkupaliwa. T'ile Owo iiraly'awe. Exariy'anyu mmansinyu khenrowa okupaliwa. Mwahiya-ru onvura sikaro okhala wira murimwiira paahi, "Ahe, vanreerela kihiye onvura sikaro okhala wira kinnihimya oKristu," Muluku khonkupali iyo. Mwahiya waakhalela ethaama athiyana, okhala wira paahi munimwiikhanyererya wira, Muluku khonkupali iyo. Eyo etthu nyuwo muniir'anyu. Iyo miteko. Ti mahala aniwoopolani. Muluku ohoorwa wa nyuwo khukumiha etthu yothene mwa nyuwo? Eyo t'itthu enttharelana.

²⁶² Muniira, "Kihitakaniha mukereja, nto vano kihaana ohiya itthu iya." Muluku khokupanli yeeyo, khiivo mukhanly'anyu ovahaka. Owo onkupali paahi ele Kristu ovahaly'awe. Owo onoovahani Ekumi Ehinimala, ni onookumiha mwa nyuwo. Munnitthuna waakhela Yeeyo?

. . . mphareya mw'epheyo, y'owali,
Murwe, mutthukele nankura munep'anyu
munthyaweloni wa Omumula,
Nto mwiire, "Oophentiw'aka t'awaka."
Kootthukela nankura munep'aka . . .

Vaareera, mwiinuweke muru. Mutthaka woomala vano. Nrowe nikokhorele vano.

Nkineetta-tho mphareya m'owali;
Mutaseke pooti oruma v'owali, voowiixerya,
Mwa Yesu kinkhala oolipa voohimala.

²⁶³ Atthu othene vano, nikokhorelaka.

Kootthukela nankura munep'aka
munthyaweloni wa Omumula, (Sabbath)
Nkineetta-tho mphareya m'owali;
Mutaseke pooti oruma v'owali, voowiixerya,
Mwa Yesu kinkhala oolipa voohimala.

Mwaarye mwa miyo, . . .

Mwiitaphule paahi. Mphunye maitho. Munnoona Eroho ele y'osivela? Iwo okokhorela. Mutthaka woomala. Nno okokhorela.

Muthuko wa eforora waarye mwa miyo,
O waarye mwa miyo, O Pwiya, waarye mwa
miyo,
Muthuko wa eforora waarye mwa miyo.

²⁶⁴ Akavi anoona oreera saana? Nvenxe ntata. Erooho ele, y'osivela, yowiiyeviha, ti Yeeyo.

Okhala ntoko Yesu, okhala ntoko Yesu,
Mulaponi miyo kinwehererya okhala ntoko
Yoowo;
Mukwaha wothene mulaponi mpakha
Movuwani,
Kinvekela paahi okhala ntoko . . .

Mukokhorele paahi.



AHEPERI, EKAPIITULU YA NEEEXE EMK57-0901E
(Hebrews, Chapter Four)

ITTHARANELO YA ELIVURU YA AHEPERI

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yeetaka 1 mweeri wa Setembro, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org